

四庫全書

史部

欽定四庫全書

史部

水經注釋

目錄
卷二

詳校官監察御史_臣周元良

刑部郎中_臣許兆椿覆勘

總校官降調編修_臣倉聖脉

校對官編修_臣邱庭滢

謄錄監生_臣莊士瀛

欽定四庫全書

史部十一

水經注釋

地理類四

河渠之屬

附錄

水經注箋刊誤

提要

臣等謹案水經注釋四十卷附錄二卷水經
注箋刊誤十二卷

國朝趙一清撰一清字誠夫仁和人鄆道元水

經注傳寫舛誤其來已久諸家藏本互有校
讐而大致不甚相遠歐陽元王偉諸人但稱
經注混淆而已於注文無異詞也近時寧波
全祖望始自稱得先世舊聞謂道元注中有
注本雙行夾寫今混作大字幾不可辨一清
因從其說辨驗文義離析其注中之注以大
字細字分別書之使語不相雜而文仍相屬
攷沈約宋書稱漢鏡歌本大字為詞細字為

聲後人聲詞合寫是以莫辨是傳錄混淆古
有是事又如明嘉靖中所刻齊民要術簡端
周書曰神農之時天雨粟云云一條崇禎中
刻孔子家語本姓解中微國名子爵五字間
以注文刻作大字者亦時有之至於巨帙連
篇盈四十卷而全部夾注悉誤寫為正文揆
以事理似乎不近姚宏補注戰國策范成大
作吳郡志並於注中夾注前人嘗舉以為例

而自宋以來未嘗有舉及水經注者祖望所云先世舊聞不識傳於何代載在何書殆出於以意推求而詭稱授受然倪思作班馬異同以大字細字連書俾難辨析明許相卿改為史漢方駕以班馬相同者書於中以馬有而班無者側注於左以班有而馬無者側注於右遂使增刪之意開卷釐然而原書仍無改易最為善變一清此書殆亦類是但使正

文旁義條理分明是亦道元之功臣矣何必
托諸原本效豐坊之故智乎又唐六典注稱
桑欽所引天下之水百三十七江河在焉今
本所刊僅一百一十六水攷崇文總目載水
經注三十五卷蓋宋代已佚其五卷今本乃
後人離析篇帙以合原數此二十一水蓋即
在所佚之中一清證以本注雜採他籍得淦
沼潯沱派滋伊瀍澗洛豐涇汭渠獲洙滌日

南弱黑十八水於灤水下分灤餘水又攷驗
本經知清漳水濁漳水小遼水皆原分為二
共得二十九水與六典注原數相符其攷據
訂補亦極精核卷首刊所據以校正者凡四

十本雖其中不免影附誇多

如所稱黃宗義
本原無成書顧

炎武本顧祖禹本閻若塘本皆所著書中引
用攷辨實無核本又黃儀本稱其書今歸新
城王氏池北書庫攷王士禎沒後池北書庫
所藏皆已散佚見趙執信因園集是其子孫
斷無收書之事若士禎存時所收則書歸王
氏在康熙辛卯以前一清年齒亦斷不及見

也然旁引博徵頗為淹貫訂疑辨訛是正良

多自官校宋本以外外間諸刻固不能不以
是為首矣乾隆四十六年十月恭校上

總纂官

臣紀昀

臣陸錫熊

臣孫士毅

總校官

臣

陸

費

墀

欽定四庫全書



提要

水經注釋原序

安定君之注水經雖其于禹貢之故道不能一一追溯而漢晉以後原委畢悉尤詳于陂塘堤堰之屬固有用之書也乃以過于嗜奇稱繁引博反失之龐讀者眩焉要其纏絡未嘗不蘊然可按也所苦唐以後無完書据崇文摠目則館閣所儲本亦祇三十五卷据元祐無名氏跋則蜀本且祇三十卷是以歐陽兗公尚未見四十卷之著錄及何聖從本幸復其舊然已云篇帙不無小

失而以太平寰宇記諸書校之則逸文之不見于今本者不下數百條說者以為原本當有弱黑涇洛虜沱諸篇而今不可得見矣是豈止小失乎哉然即其所幸存者脫文譌字展轉沿褫蔡正甫所謂蜀板遷就之失令人撫卷茫然難以津造雖有好學如柳大中謝耳伯趙清常朱鬱儀孫潛夫之徒再四讎定不過正其十之三如盤洲石柱之疑而于其大者未之能及也百年以來乃有專門之學顧亭林顧宛溪黃子鴻胡東樵間百詩

五君子慨然于正甫補亡之不可得見合羣籍以通之

購舊槧以校之竭精思以審之是書始漸見天日同時

劉繼莊自燕中來亦地學之雄也欲因麗澤之益奮萃

為是書之疏而惜其不果然而諸家所論証或以洮水

為澆水

東樵

或以滎水為澗水

宛溪

或以漂水有二百或以

礫谿有南北二渠

東樵

或指九江在洞庭而託之許叔重

之說

東樵宛溪

斯其過皆不小甚矣稽古之難也杭有趙君

東潛者谷林徵士之子也藏書數十萬卷甲于東南稟

其家庭之密授讀書從事于根柢之學一時詞章之士莫能抗手爰有箋釋之作拾遺糾繆旁推交通裒然成編五君子及繼莊之薪火喜有代興而諸家之毛舉屑屑者俛首下風安定至是始有功臣而正甫之書雖謂其不亡可也予家自先司空公先宗伯公先贈公三世皆于是書有校本故予年二十以後雅有志于是書始也衣食奔走近者衰病侵尋雙韭山房手校之本更是迭非卒未得畢業矐懷世學不禁慙赧而東潛奪蠹而

登囊括一切猶以余為卑耳之馬不棄其鞅絆豈知羽
毛齒革君之餘也聊舉先世之遺聞以益君則庶幾焉
謝山全祖望序

盈天地之間數物有萬而物莫不始於一說文部叙始
一終亥徐楚金曰一天地之始也一氣之化也天一生
水而地六成之五行之次惟水最先此易數與箕疇互
相發也故水浮天而載地元氣之布護筋脈之流通昔
賢譔述尊之曰經酈氏條分詮之曰注審其遠近之端

詳其小大之勢于是源流之徑趣歸宿之殊區所謂經水枝水川水者百世悠悠如指諸掌唐六典云天下水泉三億三萬五十九蓋若是之夥也觀夫善長之為人志氣剛毅故起例謹嚴博覽羣書故馳詞絢發以視江左諸公習尚浮華競誇雕組殆羞與絳灌為伍矣後之職志方輿者如李宏憲樂子正王正仲之流莫不掇其菁英奉為著蔡其間缺失五卷始記于崇文總目暨宋南渡中原文獻或失其傳學士大夫罕言其義雖嘗補

于元刊于明日月寢久譌舛實多南州朱鬱儀中尉起而箋之疑人之所難疑發人之所未發論者以為三百年來有數之作余愛之重之忘其固陋而為之釋釋之云者所以存朱氏之是兼弼鄺亭之違也錄取片長便成佳證助之張目足為快心若夫箋有繆盭則削而投之所遺漏則補之別為刊誤不欲羣入卷中惑人視聽間闕歲月始勒成編余因思水之為道也由人之治與不治耳治之則為利甚溥不治則為患甚鉅而是書又在人

之能讀與否耳善讀者追惟古帝降水警予之心用致地平天成之業而况農田水利之興慶流于宗社澤被于生民關中鄭國之渠秦所以卒兼諸侯也塞下宜禾之府漢所以遂威絕域也陳協代龍之堰安平沁口之竭智通在我雲雨由人干戈擾攘之際曷常廢浚遏之勤乎且夫李冰之平濶崖楊渙之開石牛周君光瀧水之勲張景明漳河之績載籍書之于今為烈彼杜君卿之不揆顛末橫肆譏平鹵莽滅裂斯已過矣嗚呼八枝

代絕九晝茫茫河身南徙淮不敵黃二渠不醜四瀆或
亡豈天數之使然抑人謀之不臧也若乃締章繪句躡
影希聲規索枕中之秘竊侈談柄之助風斯愈下吾無
取焉

乾隆十九年仲冬上旬瓊華街散人東潛趙一清述

欽定四庫全書

水經注釋目錄

卷一

河水一

漢書地理志金城郡河關縣積石山在西

海過郡十六行九千四百里一清按河自章武入

海之道水經則叙于濁漳水篇胡肅明以濁漳即

古徒駭河所行河去而漳得擅其流漢人指此為

禹河然云過郡六以水經考之河自黎陽以上所

水經注釋

一

平鉅鹿信都勃海而無東郡清河平原是過郡二十
一也又自章武東出為遶河逕驪成至縣碣石山
又過郡二右北平遼東合計過二十六郡班固云過
郡十六殊不可解自禹告成之年下逮周齊桓之世
九河已亡其八後數十歲為定王五年己未當
魯宣之七年而河遂東徙凡一千六百餘歲

卷二

河水二

卷三

河水三

卷四

河水四

卷五

河水五

漂水

漢志東郡東武陽縣禹治漂水東北至千乘入海過郡三行千二十里又平原郡高唐縣

桑欽言漂水所出

卷六

汾水

漢志太原郡汾陽縣北山汾水所出西南至汾陰入河過郡二行千二百里冀州寢

澮水

說文澮水出霍山西南入汾

涑水續漢書郡國志聞喜邑有涑水一清按漢志莽改河東郡曰兆隊左邑曰兆亭兆即洮洮

水即涑水也

文水一清按元和郡縣志太平寰宇記作文谷水以此水出文谷也隨置文水縣因水受氏焉

原公水一清按原公水即原過水出原過祠下者也

洞渦水魏書地形志太原郡晉陽縣同過水出木瓜嶺一出沾嶺一出大廉山一出原過祠

下五水合故曰同過西南入汾

晉水漢志太原郡晉陽縣龍山晉水所出東入汾

湛水說文湛水豫章浸一清按章字誤也當作州

卷七

濟水一

漢志河東郡垣縣禹貢王屋山在東北流
水所出東南至武德入河軼出滎陽北地

中又東至琅槐入海過
郡九行千八百四十里

卷八

濟水二

卷九

清水

漢志魏郡內黃
縣清河出南

沁水

漢志上黨郡潞縣遠縣羊頭山世靡谷沁水所
出東南至滎陽入河過郡三行九百七十里

師古曰今沁水至懷州武德入河此云滎陽疑轉寫錯悞一清按水經用山經之文故主涅縣

淇水

漢志河內郡共縣北山淇水所出東至黎陽入河一清按道元以是文載于濁漳水注中

淇水入白溝以入清河而歸于海蓋曹公過之北注故清河口有淇河口之稱也

蕩水

漢志河內郡蕩陰縣蕩水東至內黃澤

洹水

說文洹水在齊魯間一清按齊字誤當作晉見本篇注引說文並字林可證

卷十

濁漳水

漢志上黨郡長子縣鹿谷山濁漳水所出東至鄴入清漳關駟曰濁漳即潞水為冀

浸州

清漳水

漢志上黨郡沾縣大陂谷清漳水所出東北至邑成大河過郡五行千六百八十

里冀州川一清按漢志所云則濁漳自鄴縣以下皆清漳之流也陂當作陂即要字邑成是阜成之

訛

補
滏水

一清按魏都賦曰北臨漳滏是也

補
洺水

一清按說文洺水名初學記引水經注曰洺水一名漳水

卷十一

易水

漢志涿郡故安縣閭鄉易水所出東至范陽入濡并州寢亦至范陽入涑師古曰言易水

又至范陽入涑也

滏水

漢志代郡靈丘縣滏河東至文安入大河過郡五行九百四十里并州川

補

滹沱水

一清按漢志代郡南城縣滹河東至參合入庫池別過郡九行十三百四十里并

州川從河東至文安入海過郡六行十三百七十里參合是參戶之誤別下落河字河間國弓高縣庫池別河首受庫池河東至平舒入海是也從河見濁漳水注

補

派水

一清按說文派水出雁門後人戍夫山東北入海初學記引本注派水南流所播為澤俗

名天井淀明實錄太僕少卿何棟言唐滋沙鴨四水由保真定會于河間天津入海唐即滏水滋亦為大川沙即派河鴨河本名鴉兒河即滹沱之漫流四水相敵派河雖不見漢志當據許氏之書補之

補滋水

一清按漢志常山郡南行唐縣牛飲山白陸谷滋水所出東至新市入虜池水說文作白

涇谷俗本漢書誤也

卷十二

聖水

一清按聖水不見漢志其源惟記于古碑而桃水涿水垣水之見于漢志者皆載入篇中

巨馬水

漢志代郡廣昌縣涑水東南至容城入河過郡三行五百里并州寢

卷十三

灤水

漢志雁門郡陰館縣累頭山治水所出東至泉州入海過郡六行千一百里師古曰治音

戈之反燕刺王傳作合字一清按今誤本作濕水依說文校正詳本卷灤餘水同

卷十四

灋餘水

漢志上谷郡軍都縣溫餘水東至路南入沽一清按此即溫字訛誤之始

沽水

漢志漁陽郡漁陽縣沽水出塞外東南至泉州入海行七百五十里

鮑丘水

一清按鮑丘水出自戎方不見漢志而便水澠水之見于漢志者皆載入篇中

濡水

漢志漁陽郡白檀縣洳水出北蠻夷師古曰洳音呼鷗反遼西郡肥如縣元水東入濡水

濡水

南入海陽一清按洳水道元注引地理志作洳水洳字誤也南入海陽當作南至海陽入海

遼水

漢志遼東郡望平縣大遼水出塞外南至安市入海行千二百五十里

小遼水

漢志元菟郡高句麗縣遼山遼水所出西南至遼隊入大遼水

渭水

漢志樂浪郡渭水縣渭水西至增地入海說文渭水出樂浪樓方東入海一曰出渭水縣

卷十五

洛水

漢志宏農郡上洛縣禹貢雒水出冢領山東北至鞏入河過郡二行千七十里豫州川

伊水

漢志宏農郡盧氏縣熊耳山在東伊水出東北入雒過郡二行四百五十里

澠水

漢志河南郡穀成縣禹貢澠水出僭亭北東南入雒

澗水

漢志宏農郡新安縣禹貢澗水在東南入雒一清按禹貢伊洛澠澗既入于河明四水之

相敵也孔穎達正義以為伊澠澗三水入洛合流入河然所出之源既異水經漾沔自分淮泗各殊是其例也況澗水下流兼被穀水之稱水經尚不并穀于澗而乃附三水于洛乎禹貢導水明云導

洛自熊耳東會于澗澠又東會于伊又東北入于河戰國時以河洛伊為三川張儀曰三川周室天下之市朝也秦以之置郡而周靈王二十二年穀洛關說者謂澗水于是始有穀水之稱穀即澗也觀此則安見三水之弱小于洛而僅僅附見也哉宋林少穎曰據伊澠澗入于洛而洛入于河禹貢則以四水列言者曾氏曰漢水入江以入海而荊州言江漢朝宗于海與此同意蓋其水之大小相敵也可為先得我心矣三水宜並列于目故詳著焉善乎胡朏明之言曰古時澗水經河南故城西入洛澠水經河南故城東入洛故澗水東澠水西為王城而澠水東為下都洛誥之文甚明也自周靈王壅穀水使東出于王城之北則其勢必入于澠水而合流歷王城之東以南注于洛時二水猶未經洛陽城也迨東漢建都于此自河南縣東十五里之千金碣引水繞都城南北以通漕而澠水

始與穀水俱東注矣古時瀍不合澗亦不過洛陽縣南而未至偃師也

卷十六

穀水

漢志宏農郡黽池縣穀水出穀陽谷東北至穀城入雒

甘水

續志河南尹河南縣有甘城劉昭補註杜預曰縣西南有甘泉京相璠土地名曰甘水北

洛入

漆水

漢志右扶風杜陵岐山東入渭一曰入洛

澧水

說文澧水出京兆藍田入灊地形志京兆郡山北縣苦谷澧水出焉一清按漢志謂之沂

水

瀘水

漢志北地郡直路縣沮水出東西入洛一清按沮水當依說文作瀘水側加切又說文是

出西東入洛

與漢志異

補

洛水

漢志北地郡歸德縣洛水出北蠻夷中入河左馮翊襄德縣洛水東南入渭一清按周禮

雍州浸曰渭洛孔安國尚書傳雍州曰漆沮之水

已從入渭導渭曰漆沮二水名亦曰洛水出馮翊

北說文洛水出左馮翊歸德北夷界中東南入渭

歸德屬北地郡許氏誤也然則班志所云入河者

蓋由渭以達于河也此與出自

熊耳會伊入河之洛截然不同

卷十七

渭水上

漢志隴西郡首陽縣禹貢鳥鼠同穴山在西南渭水所出東至船司空入河過郡四

行千八百七
十里雍州寢

卷十八

渭水中

卷十九

渭水下

補
豐水

漢志右扶風鄠縣鄠水出東南北過上林入渭一清按禹貢漆沮既從豐水攸同詩大雅

豐水東注維禹之績
豐亦入渭之大川也

補

涇水

漢志安定郡涇陽縣升頭山在西禹貢涇水所出東南至陽陵入渭過郡三行千六十里

雍州川一清按說文涇水出安定涇陽并頭山東南入渭離州之川也

補
汭水漢志右扶風汭縣汭水出西北東入涇雍州川一清按說文汭水相入也師古曰汭在幽

卷二十

漾水漢志隴西郡氐道縣禹貢養水所出至武都入漢師古曰字本作漾或作漾又西縣禹貢

嶓冢山西漢水所出南入廣漢白水東南至江州入江過郡四行二千七百六十里

丹水漢志宏農郡丹水縣丹水出上雒冢領山東至析入鈞

卷二十一

汝水漢志汝南郡定陵縣高陵山汝水出東南至新蔡入淮過郡四行千三百四十里應劭曰

汝水出弘農入淮一清按潁川郡亦有定陵縣有東不羹城莽曰定城者也續志潁川有定陵而汝南無之其潁川之定陵云有東不羹劉昭補注引地道記云高陵山汝水所出蓋合前書二縣而一之

卷二十二

潁水

漢志潁川郡陽城縣陽乾山潁水所出東南至下蔡入淮過郡三行千五百里荊州寢

洧水

漢志潁川郡陽城縣陽城山洧水所出東南至長平入潁過郡三行五百里

潁水

漢志河南郡密縣大騮山潁水所出南至臨潁入潁一清按說文潁與職切又有潁水亦

出河南密縣東入潁音與職切二水字形相近音聲又同似是一水而重出者

漕水

說文漕水出鄭國詩曰漕與洧方渙渙兮

渠水

漢志河南郡滎陽縣狼蕩渠首受沛東南至陳入潁過郡四行七百八十里一清按水經

漕水下有渠水即蕩蕩渠實大川也宜著于篇目善乎禹貢雖指之言曰自滎陽引河後遽加疏導枝津交絡名稱乎見使後人目眩心搖今綜其大略以蕩蕩渠為主水經注云渠水自河與濟亂流東逕滎澤北東南分濟歷中牟縣之圃田澤與陽武分水又東南為官渡水又東至浚儀縣左則故渠出焉秦始皇二十二年王賁斷故渠引水東南出以灌大梁謂之梁溝世遂目故渠曰陰溝而以梁溝為蕩蕩渠陰溝東南至大梁城合蕩蕩渠其東導者為汜水至蒙縣為獲水又東至彭城縣入泗蕩蕩渠自大梁城南南流為鴻溝鴻溝又兼沙水之目沙水東南流至新陽縣為百尺溝注于潁

水此即班固所謂菴蕩渠首受沛東南至陳入潁者也其一水自百尺溝分出東南流至義城縣西而南注淮謂之沙汭沙水所出又有睢水渦水睢水自陳留縣首受菴蕩渠東南流至下相縣入泗渦水自扶溝縣首受菴蕩渠東南流至義城縣南而東注淮以上諸渠同源出于河之濟故言鴻溝者指此為鴻溝言菴蕩渠者指此為菴蕩渠言汴水者指此為汴水言浚儀渠者指此為浚儀渠皆以下流之目追被上源也此外有濟隧上承河水于菴縣北河南流與出河之濟會自于岑造八激隄而其流遂斷其言至為明晰今陰溝汭睢瓠子諸水皆自為一篇而渠水無稱焉豈鄭氏原書如是乎要為後來之脫誤無疑也

卷二十三

陰溝水

漢志淮陽國扶溝縣渦水首受狼蕩渠東至向入淮過郡三行千里

汧水

漢志河南郡滎陽縣卞水在西南說文汧水受陳留浚儀陰溝至蒙為灘水入于泗徐鉉

曰今作

汧非是

獲水

一清按漢志梁國蒙縣獲水首受留獲渠東北至彭城入泗過郡五行五百五十里一清

按汧水雖亦至梁郡蒙縣為灘水自與出蒙縣北之獲水源流有別今本篇目不具更列之

卷二十四

睢水

漢志陳留郡浚儀縣睢水首受狼蕩渠水東至取慮入泗過郡四行千三百六十里又沛

郡茫縣應劭

曰睢水出焉

瓠子水

漢志陳留郡封丘縣漢渠水首受沛東北至都關入羊里水過郡三行六百三十里

一清按漢渠

即瓠子河

汶水

漢志泰山郡汶水出萊毋西入濟又萊蕪縣原山禹貢汶水出西南入沛汶水桑欽所言

按司馬彪郡國志云萊蕪有原山潘水出劉昭補注杜預曰汶水出然則潘水有異名乎

卷二十五

泗水

漢志濟陰郡乘氏縣泗水東南至睢陵入淮過郡六行千一百一十里又魯國卞縣泗水

西南至方與入沛過郡三行五百里青州川一清按班固所云若二水者及讀道元注濟水篇云乘氏無泗水乃荷水方知泗字是荷字之誤然則出卞者是也入沛當作入沛

沂水

漢志泰山郡蓋縣沂水南至下邳入泗過郡五行六百里青州漫說文沂水出東海費東

西入泗一曰沂水出泰山蓋青州漫

洙水

一清按漢志泰山郡蓋縣臨樂子山洙水所出西至蓋入池道元注以池為泗之誤說文

云出臨樂山無子字世本目錄今補

卷二十六

洙水

漢志琅琊郡東莞縣術水南至下邳入泗過郡三行七百一十里青州寢師古曰術水即

流水

巨洋水

漢志琅琊郡朱虛縣凡山丹水所出東北至壽光入海

溜水

漢志泰山郡萊蕪縣原山溜水所出東至博昌入沛幽州寢又千乘郡博昌縣時水東北

至鉅定入馬

車瀆幽州寢

汶水

漢志琅瑯郡朱虛縣東泰山汶水所出東至安丘入維師古曰前言汶水出萊蕪入濟今

此又言出朱虛入維將桑欽所說有異或者有二汶水乎一清按此即所謂東汶非禹貢之汶也

濰水

漢志琅瑯郡箕縣禹貢濰水北至昌都入海過郡三行五百三十里兗州寢一清按北海

郡有都昌縣昌都字倒互耳

膠水

漢志琅瑯郡邦縣膠水東至平度入海

卷二十七

沔水上

漢志武都郡沮縣沮水出東狼谷南入沙
美入江過郡五行四千里荊州一清按

世本沔水分上中下三篇今移下篇接上
篇之末省去中篇之目改為上下二篇

卷二十八

沔水下

卷二十九

潛水

漢志巴郡宕渠縣符特山在西南潛水西南
入江不啻水出東北南入瀟徐谷說文漢出

為潛

湍水

漢志宏農郡析縣黃水出黃谷
鞠水出析谷俱東至酈入湍水

洵水

漢志宏農郡盧氏縣熊耳山在東育水南至順陽入沔過郡二行六百里一清按育即洵

也宏農郡丹水縣下作鈞師古曰鈞亦水名也音均

粉水

太平寰宇記粉水出房陵縣北永林山一清按粉水不見漢志即上粉縣亦莫能定為何

時所置姑以樂史所云補之

白水

一清按此即漢志所謂蔡陽白水鄉也春陵之封徙于此

泚水

漢志南陽郡泚陽縣應劭曰泚水東入蔡一清按泚水今誤本漢書俱作泚當以水經注

正之

卷三十

淮水

漢志南陽郡平氏縣禹貢桐柏大復山淮水所出東南至淮陵入海過郡四行三千二百

四十里

青州川

卷三十一

潢水

漢志南陽郡魯陽縣魯山潢水所出東北至定陵入汝

洧水

漢志南陽郡鄴縣育水出西北南入漢說文洧水出宏農盧氏山東南入沔或曰出鄴山

西

潁水

漢志汝南郡潁強縣應劭曰潁水出潁川陽城說文潁水出潁川陽城少室山東入潁

濯水

漢志汝南郡濯陽縣應劭曰濯水出吳房東入潁

瀨水

漢志南陽郡舞陰縣中陰山瀨水所出東至蔡入汝一清按水經是上蔡入汝今本漢書

落上字說文瀨水出

南陽中陽山入潁

潁水

漢志潁川郡舞陽縣應劭曰舞水出南一清按說文潁水出南陽舞陰東入潁今本漢書

出南下落陽字潁

陰南陽之屬縣也

潁水

說文潁水出南陽蔡陽東入夏水

卷三十二

潁水

一清按漢志無潁水說文潁水深也亦不云是水名

蕲水

說文江夏有蕲春亭徐鉉曰按說文無蕲字他書亦無此篇下有蕲字注云江夏平春亭

名疑相承誤重出一字渠支切又說文荇从艸荇聲江夏平春有荇亭語斤切一清按江夏有蘄春縣晉改曰蘄陽是因蘄水得名不知鼎臣何以云爾

決水漢志廬江郡雩婁縣決水北至蓼入淮又有灌水亦北至蓼入決過郡二行五百一十里

一清按入淮之淮即灌水
非出桐柏之淮水者也

泚水漢志廬江郡濡縣泚山泚水所出北至壽春入芍陂

泄水說文泄水受九江博安洵波入氏一清按全氏祖望曰洵波當是芍陂之誤又九江不聞

有氏水蓋泄水合泚水以入淮而或誤以為入泚水經泚水篇云泄水從南來注之善長糾之曰泚

陽無泚水蓋誤引壽春之泚耳又因泚訛而為氏

肥水

漢志九江郡合肥縣應劭曰夏水出父城至此與淮合故曰合肥一清按所謂夏水即漢

志沛郡城父縣之夏肥水也然夏肥與肥陽淮南北仲瑗合而一之誤矣

施水

一清按施水合肥故縣有合肥之稱水經不溯其所出而曰亦從廣陽鄉東南入湖與全

書義例多所未合

補滁水

一清按說文滁水名唐六典七曰淮南道其大川有滁肥之水巢湖在焉是也

沮水

漢志漢中郡房陵縣東山沮水所出東至郢入江行七百里

漳水

漢志南郡臨沮縣禹貢南條荆山在東北漳水所出東至江陵入陽水陽水入河行六百

里

夏水

漢志南郡華容縣夏水首受江東入沔行五百里又武都郡武都縣東漢水受氏道水一

名沔過江夏謂之夏水入江又江夏郡注引應劭曰沔水自江別至南郡華容縣為夏水過郡入江故曰江夏一清按本篇注引仲瑗語與孟堅南郡下分注合是文則又主康成之說自相矛盾而故起而糾正之

羌水

漢志隴西郡羌道縣羌水出塞外南至陰平入白水過郡三行六百里又廣漢郡向氏道

縣白水出徼外東至葭萌入漢過郡一行九百五十里

涪水

漢志廣漢郡剛氏道縣涪水出徼外南至墊江入漢過郡二行千六十九里

梓潼水

漢志廣漢郡梓潼縣五婦山馳水所出南入涪行五百五十里應劭曰潼水所出南

入墊江一清按據

經文當作梓潼水

涪水

一清按漢志漢中郡南鄭縣旱山池水所出東北入漢無涪水其安陽縣鶯谷水出西南

北入漢即涪水也道元載于沔水注中

卷三十三

江水上

漢志蜀郡蒲氏道縣禹貢岷山在西徼外江水所出東南至江都入海過郡七行二

千六百六十里一清按今本漢書誤也宋本是過郡九行七十六百六十里又廬江郡尋陽縣九江在南皆東合大江禹貢錐指曰今江水所過於漢為蜀郡犍為巴郡南郡長沙江夏豫章廬江丹陽會稽廣陵凡十郡一國又水經江水東逕宜昌縣之流頭灘注引素山松曰自蜀至此五十餘里千

實晉紀云紀陟對司馬昭曰西陵至江都五千七
百里宣昌今宜都也在西陵之東誠如所言則江
自岷山至江都入海行萬餘里易祓曰江源自松
州交川縣至夷陵凡四千三百三十里自夷陵至
泰州凡三千六百三里江自松潘至泰州行七千
九百六十里自泰州至海門又四百里通計八千
三百餘里據此則俗本漢書固非而宋本亦未合也

卷三十四

江水中

卷三十五

江水下

卷三十六

青衣水

漢志蜀郡青衣縣禹貢蒙山谿大渡水東南至南安入濊一清按道元引此文在江

水篇濊乃濊之誤蒙山谿即青衣水大渡水即沫水也

桓水

漢志蜀郡桓水出蜀山西南行羌中入南海

若水

漢志蜀郡旄牛縣若水出徼外南至大茆入繩過郡二行千六百里

沫水

一清按即漢志蜀郡青衣縣之大渡水也又續志蜀郡屬國漢嘉故青衣劉昭補注引華

陽國志曰有沫水從邛來出岷江又從岷山西來合郡下青衣水入大江

延江水

一清按延江水不見漢志而祥柯郡龍縣之龍水捷為郡符縣之溫水黥水皆載入

卷中又此下俗本有沅酉水篇目卷中只有經文一句而酉水源流附見沅水注且南方之水無沅酉之名蓋是延江水注尾結語而誤以為經者今注既改正并削其目

存水

一清按漢志犍為郡郫縣不云有水而鬱林郡定周縣水首受無飲據道元注似在郫

郫為存水在定周為周水也

溫水

漢志犍柯郡鐔封縣溫水東至廣鬱入鬱過郡二行五百六十里

卷三十七

淹水

說文淹水出越雋徼外東入若水

葉榆水

漢志益州郡葉榆縣葉榆澤在東

夷水

漢志南郡巫縣夷水東至夷道入江過郡二行五百四十里

油水

漢志南郡高成縣泥山泥水所出東入緜緜水南至華容入江過郡二行五百里說文油

水出武陵孱陵
西東南入江

澧水

漢志武陵郡充縣歷山澧水所出東至下雋入沅過郡二行一千二百里一清按據道元

注特其支
流入沅耳

沅水

漢志牂柯郡故且蘭縣沅水東南至益陽入江過郡二行二千五百三十里

浪水

漢志武陵郡鐔成縣康谷水南入海一清按康谷水豈即浪水乎

卷三十八

資水

漢志零陵郡都梁縣路山資水所出東北至益陽入沅過郡二行千八百里

連水

一清按連水不見漢志道元所謂資水之別是也

湘水

漢志零陵郡零陵縣陽海山湘水所出北至邛入江過郡二行二千五百三十里

灕水

漢志零陵郡零陵縣又有灕水東南至廣信入鬱林一清按班固但記灕水于零陵縣下

耳初不云出陽海山也道元不知以為湘灕同源此大繆也灕水乃牂柯江下流至秦史祿始通之

于湘所謂靈渠者也見范成大桂海虞衡志

秦水

漢志桂陽郡臨武縣秦水東南至潁陽入滙行七百里

卷三十九

湓水

漢志桂陽郡桂陽縣湓水南至四會入鬱林過郡二行九百里一清按湓當依說文作湓

云水出桂陽盧聚山湓浦為桂水湓水經云過潁陽縣出湓浦關與桂水合南入于海注云湓水又南注于鬱而入海其言與班固合應劭云含湓湓水所出東北入沅道元起而糾正之說文湓浦下

落關字

漢水

說文漢水出桂陽南平西入營道从水寔聲一清按據水經當云西至營道入湘

鍾水

一清按鍾水水經有灌水之稱乃俗傳之誤亦即桂水也道元故特起而糾正之

耒水

漢志桂陽郡郴縣耒山水所出西至湘南入湘

洙水

漢志長沙國茶陵縣泥水西入湘行七百里

澆水

一清按羅含湘中記曰澆水注湘

澗水

一清按羅含湘中記曰澗水注湘

澗水

說文澗水出豫章艾縣西入湘

贛水

漢志豫章郡贛縣豫章水出西南入大江又

一清

按此即道元注所云豫章水右通湖漢水者也

廬江水

漢志廬江郡廬江出陵陽東南北入江

卷四十

漸江水

漢志丹陽郡黟縣漸江水出南蠻夷中東入海一清按說文云漸水出丹陽黟南蠻

中東入海又云江
水東至會稽山陰
為浙江續志

會稽郡山陰有浙江
劉昭補註引郭璞注
山海經

曰江出歙
縣玉山

斤江水

漢志鬱林郡領
方縣有斤員水

日南水

漢志日南郡有小水十六并
行三千一百八十里屬交州
一清按今卷末有容容諸

水注云右三十水從江已南
至日南郡數與班志不合實
即是水也當補列于目

補

弱水

說文弱水自張掖刪丹西至
酒泉合黎餘波入于流沙桑
欽所說

補

黑水

漢志益州郡滇池縣有黑水
祠一清按禹貢山水澤地所
在篇有合黎山則弱水所經
也

三危山則黑水所經也二水
為雍梁之大川水經不應遺
之史記索隱尚書正義俱引
其書則是二

篇亦在失亡之列致使言禹貢者莫能詳二水之源流惜哉

禹貢山水澤地所在

一清按卷尾嵩高為中嶽已下至三潁池是釋禹貢山水

澤地所在凡六十今本不具于目似亦缺漏

欽定四庫全書

水經注釋卷一

仁和趙一清撰

河水一

崑崙虛在西北

山三成為崑崙丘崑崙說曰崑崙之山三級下曰樊桐一名板松二曰玄圃一名閼風上曰層城一名天庭是謂太帝之居

去嵩高五萬里地之中也

禹本紀與此同高誘稱河出崑山伏流地中萬三千里禹導而通之出積石山按山海經自崑崙至積石一千七百四十里自積石出隴西郡至洛隄地志可五千餘里又按穆天子傳天子自崑崙山入于宗周乃里西土之數自宗周灋水以西至于河宗之邦陽紆之山三千有四百里自陽紆西至河首四千里合七千四百里

一清按三國志蜀書郤正傳其釋譏曰陽盱請而洪災息裴松之註引淮南子

曰禹為水以身請于陽紆之阿即陽紆也漢志冀州藪曰陽紆洿雅作陽勝又一陽紆也外國圖又云從大晉國正西七萬里得崑崙之虛諸仙居之數說不同道阻且長經記綿虢水陸路殊徑復不同淺見未聞非所詳究不能不聊述聞見以誌差違也

其高萬一千里

山海經稱方八百里高萬仞郭景純以為自上二千五百餘里淮南子稱高萬一千里百一十四步三尺六寸

河水

春秋說題辭曰河之為言荷也荷精分布懷陰引度也釋名曰河下也隨地下處而通流也考異郵曰河者水之氣四瀆之精也所以流化元命苞曰五行始焉萬物之所由生元氣之腠液也管子曰水者地之血氣筋脈之通流者故曰水具財也五害之屬水最為大水有大小有遠近水出山而流入海者命曰經水引他水入於大水及海者命曰枝水出於地溝流於大

水及於海者又命曰川水也莊子曰秋水時至百川
灌河經流之大孝經援神契曰河者水之伯上應天
漢新論曰四瀆之源河最高而長從高注下水流激
峻故其流急徐幹齊都賦曰川瀆則洪河洋洋發源
崑崙九流分逝北朝滄淵驚波沛厲浮沫揚奔風俗
通曰江淮河濟為四瀆瀆通也所以通中國垢濁白
虎通曰其德著大故稱瀆釋名曰瀆獨也各獨出其
所而入海

出其東北陬

山海經曰崑崙虛在西北河水出其東北隅爾雅曰色白所渠并千七百一川色黃物理論曰河色黃者衆川之流蓋濁之也百里一小曲千里一曲一直矣

漢大司馬史張仲功

一清按漢書溝洫志大司馬史張戎師古曰雜論云字仲功習

灌溉事也

議曰河水濁清澄一石水六斗泥而民競引河

溉田令河不通利至三月桃花水至則河決以其噎不洩也禁民勿復引河是黃河兼濁河之名矣述征

記曰盟津河津恒濁方江為狹比淮濟為闊寒則冰厚數丈冰始合車馬不敢過要須狐行云此物善聽水下無水乃過人見狐行方渡余按風俗通云里語稱狐欲渡河無如尾何且狐性多疑故俗有狐疑之說亦未必一如緣生之言也

屈從其東南流入于渤海

山海經曰南即從極之淵也一曰中極之淵深三百

仞唯馮夷都焉

一清按山海經本作冰夷郭璞注冰夷馮夷也即河伯也括地圖

曰馮夷恒乘雲駕二龍河水又出於陽紆陵門之山

而注於馮逸之山穆天子傳曰天子西征至陽紆之

山河伯馮夷之所都居

一清按穆天子傳本作無夷注無夷馮夷也

是惟

河宗氏天子乃沈珪璧禮焉河伯乃與天子披圖視

典以觀天子之寶器玉果璿珠燭銀金膏等物皆河

圖所載河伯以禮穆王視圖方乃導以西邁矣粵在

伏羲受龍馬圖於河八卦是也故命歷序曰河圖帝

王之階圖載江河山川州界之分野後堯壇於河受

龍圖作握河記建虞舜夏商咸亦受焉李尤盟津銘
洋洋河水朝宗于海徑自中州龍圖所在淮南子曰
昔禹治洪水具禱陽紆蓋於此也高誘以為陽紆秦
藪非也釋氏西域志曰阿耨達大山其上有大淵水
宮殿樓觀甚大焉山即崑崙山也穆天子傳曰天子
升崑崙封豐隆之塋何氏焯曰吳中沈本作莽豐隆雷公也雷電
龍箋曰三字誤一清按三字句截龍即壘字古字通
周河水注龍下地名也有丘郭墳墟即是此義
即阿耨達宮也其山出六大水山西有大水名新頭

河郭義公廣志曰甘水也在西域之東名曰新陶水
山在天竺國西水甘故曰甘水有石鹽白如水精火
燬則破而用之康泰曰安息月支天竺至伽那調御
皆仰此鹽釋法顯曰度葱嶺已入北天竺境於此順
嶺西南行十五日其道艱阻崖岸險絕其山唯石壁
立千仞臨之目眩欲進則投足無所下水名新頭
河昔人有鑿石通路施倚梯者凡度七百梯度已躡
縣絙過河河兩岸相去咸八十步九譯所絕漢之張

騫甘英皆不至也余診諸史傳即所謂屬賓之境有
磐石之磴道狹尺餘行者騎步相持絙橋相引二十
餘里方到縣度阻險危害不可勝言郭義恭曰烏耗
之西有縣度之國山谿不通引繩而度故國得其名
也一清按後漢書章懷注引西域傳曰懸度者石山
也谿谷不通以繩索相引而度去陽關五千八百
五十里又曰其處在皮山國以西屬賓國之東也其人山居佃于石壁間累

石為室民接手而飲所謂援飲也有白草出小步馬
有驢無牛是其縣度乎釋法顯又言渡河便到烏菴

國烏菴國即是北天竺佛所到國也佛遺足跡於此
其跡長短在人心念至今猶爾及曬衣石尚在新頭
河又西南流屈而東南流逕中天竺國兩岸平地有
國名毗荼佛法興盛又逕捕那般河河邊左右有二
十僧伽藍此水逕流摩頭羅國而下合新頭河自河
以西天竺諸國自是以南皆為中國人民殷富中國
者服食與中國同故名之為中國也泥洹已來聖衆
所行威儀法則相承不絕自新頭河至南天竺國迄

于南海四五萬里也釋氏西域記曰新頭河經罽賓
犍越摩訶刺諸國而入南海是也阿耨達山西南有
水名遙奴山西南小東有水名薩罕小東有水名恒
伽此三水同出一山俱入恒水康泰扶南傳曰恒水
之源乃極西北出崑崙山中有五大源諸水分流皆
由此五大源枝扈黎大江出山西北流東南注大海
枝扈黎即恒水也故釋氏西域志有恒曲之目恒北
有四國最西頭恒曲中者是也有拘夷那喝國南城

傳曰恒水東南流逕拘夷那喝國南城北雙樹間有
希連禪河河邊世尊於此北首般泥洹分舍利處支
僧載外國事曰佛泥洹後天人以新白縹裹佛以香
花供養滿七日盛以金棺送出王宮渡一小水水名
醯蘭那去王宮可三里許在宮北以旃檀木為薪天
人各以火燒薪薪了不然大迦葉從流沙還不勝悲
號感動天地從是之後他薪不燒而自然也王欲舍
利用金作斗量得八斛四斗諸國王天龍神王各得

少許齋還本國以造佛寺阿育王起浮屠於佛泥洹處雙樹及塔今無復有也此樹名娑羅樹其樹花名娑羅伽也此華色白如霜雪香無比也竺枝扶南記曰林楊國去金陳國步道二千里車馬行無水道舉國事佛有一道人命過燒葬燒之數千束樵故坐火中乃更著石室中從來六十餘年尸如故不朽竺枝目覩之夫金剛常住是明永存舍利剎見畢天不朽所謂智空罔窮大覺難測者矣其水亂流注於恒恒水

又東逕毗舍利城北釋氏西域志曰毗舍利維邪離國也支僧載外國事曰維邪離國去王舍城五十由旬城周圍三由旬維詰家在大城裏宮之南去宮七里許屋宇壞盡惟見處所爾釋法顯云城北有大林重閣佛住於此本菴婆羅女家施佛起塔也城之西北三里塔名放弓仗恒水上流有一國王國王小夫人生肉胎大夫人妬之言汝之生不祥之徵卽盛以木函擲恒水中下流有國王遊觀見水上木函開看

見千小兒端正殊好王取養之遂長大甚健勇所往
征伐無不摧伏次欲伐父王本國王大憂愁小夫人
問何故憂愁王曰彼國王有千子勇健無比欲來伐
吾國是以愁爾小夫人言勿愁但於城西作高樓賊
來時置我樓上則我能却之王如是言賊到小夫人
於樓上語賊云汝是我子何故反作逆事賊曰汝是
何人云是我母小夫人曰汝等若不信者盡張口仰
向小夫人即以兩手捋乳乳作五百道俱墜千子口

中賊知是母即放弓仗二父王作是思惟皆得辟支
佛今其塔猶在後世尊成道告諸弟子是吾昔時放
弓仗處後人得知於此處立塔故以名焉千小兒者
即賢叔千佛也釋氏西域志曰恒曲中次東有僧迦
扇柰揭城即佛下三道寶階國也法顯傳曰恒水東
南流逕僧迦施國南佛自忉利天東下三道寶階為
母說法處寶階既沒阿育王於寶階處作塔後作石
柱柱上作師子像外道少信師子為吼怖致心誠恒

水又東逕罽賓饒夷城南城南接恒水城之西北六七里恒水北岸佛為諸弟子說法處恒水又東南逕沙祇國北出沙祇城南門道東佛嚼楊枝刺土中生長七尺不增不減今猶尚在恒水又東南逕迦維羅衛城北故曰淨王宮也城東五十里有王園園有池水夫人入池洗浴出池北岸二十步東向舉手攀樹生太子太子墮地行七步二龍吐水浴太子遂成井池衆僧所汲養也太子與難陀等撲象角力射箭入

地今有泉水行旅所資飲也釋氏西域記曰城北三里恒水上父王迎佛處作浮圖作父抱佛像外國事曰迦維羅越國今無復王也城池荒穢惟有空處有優婆塞姓釋可二十餘家是昔淨王之苗裔故為四姓住在故城中為優婆塞故尚精進猶有古風彼日浮圖壞盡條王彌更修治一浮圖私訶條王送物助成今有十二道人住其中太子始生時妙后所攀樹樹名須迦

朱氏謀瑋箋曰須字之下原闕一字因果經云樹名無憂即此樹乎一清按翻譯名

義集阿輪迦大輪翻無憂樹史記正義曰浮圖經曰
阿輪迦樹是夫人所攀生太子樹也全氏祖望曰頻
迦即阿輪迦也音同阿育王以青石作后攀生太子像昔樹無

復有後諸沙門取昔樹栽種之展轉相承到今樹枝
如昔尚蔭石像又太子見行七步足跡今日文理見
存阿育王以青石挾足跡兩邊復以一長青石覆上
國人今日恒以香花供養尚見足七形文理分明今
雖有石覆無異或人復以數重吉貝重覆帖著石上
逾更明也太子生時以龍王夾太子左右吐水浴太

子見一龍吐水煖一龍吐水冷遂成二池今尚一冷
一煖矣太子未出家前十日出往王田閭浮樹下坐
樹神以七寶奉太子太子不受於是思惟欲出家也
王田去宮一據據左一據據者晉言十里也太子以
三月十五日夜出家四天王來迎各捧馬足爾時諸
神天人側塞空中散天香花此時以至河南摩強水
即於此水邊作沙門河南摩強水在迦維羅越北相
去十由旬此水在羅閱祇瓶沙國相去三十由旬菩

薩於是暫過瓶沙王出見菩薩菩薩於瓶沙隨樓那
果園中住一日日暮便去半達鉢愁宿半達晉言白
也鉢愁晉言山也白山北去瓶沙國十里明旦便去
暮宿曇蘭山去白山六由旬於是逕詣貝多樹貝多
樹在貝多閼祇北去曇蘭山二十里太子年二十九
出家三十五得道此言與經異故記所不同竺法維
曰迦維衛國佛所生天竺國也三千日月萬二千天
地之中央也康泰扶南傳曰昔范旃時有嚕楊國人

家翔梨嘗從其本國到天竺展轉流賈至扶南為旃
說天竺土俗道法流通金寶委積山川饒沃恣其所
欲左右大國世尊重之旃問之今去何時可到幾年
可迴梨言天竺去此可三萬餘里往還可三年踰及
行年四方返以為天地之中也恒水又東逕藍莫塔
塔邊有池池中龍守護之阿育王欲破塔作八萬四
千塔悟龍王所供知非世有遂止空荒無人羣象以
鼻取水灑地若蒼梧會稽象耕鳥耘矣恒水又東至

五河合口蓋五水所會非所詳矣阿難從摩竭國向毗舍離欲般泥洹諸天告阿闍世王王追至河上毗舍離諸梨車聞阿難來亦復來迎俱到河上阿難思惟前則阿闍世王致恨卻則梨車復怨即於中河入火光三昧燒具兩般泥洹身二分分各在一岸二王

各持半舍利還起二塔渡河南下一由延

朱氏謀埒箋曰毗曇

論云四肘為一弓五百弓為一拘盧舍今之二里也八拘盧舍為一由旬今十六里也又云梵衆天身長半由延梵福樓身長一由延而不言由延之數疑與由旬同義而字殊耳一清按由旬亦作由巡又因巡

轉為延也到摩竭提國已連弗邑邑即是阿育王所治之

城城中宮殿皆起牆闕雕文刻鏤累大石作山山下
作石室長三丈廣二丈高丈餘有大乘婆羅門子名
羅汰私婆亦名文殊師利住此城裏契悟多智事無
不達以清淨自居國王宗敬師事之賴此一人宏宣
佛法外不能陵凡諸中國惟此城為大民人富盛競
行仁義阿育王壞七塔作八萬四千塔最初作大塔
在城南三

一清按黃氏
慎中本作二

里餘此塔前有佛跡起精舍

戶北向塔塔南有石柱大四五圍高三丈餘上有銘
題云阿育王以閻浮提布施四方僧還以錢贖塔塔
北三四百步阿育王於此作泥犁城中有石柱亦高
三丈餘上有師子柱有銘記作泥犁城因緣及年數
日月恒水又東南逕小孤石山山頭有石室石室南
向佛昔坐其中天帝釋以四十二事問佛一一以指
畫石一清按孫氏潛用趙清常三校本旁註佛以三指畫石愚意古書凡重文皆作二此句之首應
有佛字與上佛字重後人傳鈔遂畫跡故在恒水又
拆為一一趙本三字疑亦妄增爾

西逕王舍新城是阿闍世王所造出城南四里入谷至五山裏五山周圍狀若城郭即是薄沙王舊城也東西五六里南北七八里阿闍世王始欲害佛處其城空荒又無人徑入谷傳山東南上十五里到耆闍崛山未至頂三里有石窟南向佛坐禪處西北三

清一

按黃本作四

十步復有一石窟阿難坐禪處天魔波旬化

作雕鷲恐阿難佛以神力隔石舒手摩阿難肩怖即得止鳥跡手孔悉存故曰雕鷲窟也其山峰秀端嚴

是五山之最高也釋氏西域記云耆闍崛山在阿耨
達王舍城東北西望其山有兩峰雙立相去二三里
中道鷲鳥常居其嶺土人號曰耆闍崛山山名耆闍
鷲也又竺法維云何語羅閱祇國有靈鷲山胡語云
耆闍崛山山是青石頭似鷲鳥阿育王使人鑿石假
安兩翼兩腳鑿治其身今見在遠望似鷲鳥形故曰
靈鷲山也數說不同遠邇亦異今以法顯親宿其山
誦首楞嚴香花供養聞見之宗也又西逕迦那城南

二十一清按黃十里到佛苦行六年坐樹處有林木西
本作三

行三里到佛入水洗浴天王按樹枝得攀出池處又
北行二里得彌家女奉佛乳糜處從此北行二里佛
於一大樹下石上東向坐食糜處樹石悉在廣長六
尺高減二尺國中寒暑均調樹木或數千歲乃至萬
歲從此東北行二十里到一石窟菩薩入中西向結
跏趺坐心念若我成道當有神驗石壁上即有佛影
現長三尺許今猶明亮時天地大動諸天在空言此

非過去當來諸佛成道處去此西南行減半由延貝
多樹下是過去當來諸佛成道處諸天導引菩薩起
行離樹三十步天授吉祥草菩薩受之復行十五步
五百青雀飛來繞菩薩三匝西去菩薩前到貝多樹
下敷吉祥草東向西坐時魔王遣三玉女從北來試
魔王自從南來試菩薩以足指按地魔兵卻散三女
變為老母莫不自服佛於泥拘律樹下方石上東向
坐梵天來詣佛處四天王捧鉢處皆立塔外國事曰

毗婆梨佛在此一樹下六年長者女以金鉢盛乳糜
上佛佛得乳糜往尼連禪河浴浴竟於河邊噉糜竟
擲鉢水中逆流百步鉢沒河中迦梨郊龍王接取在
宮供養先三佛鉢亦見佛於河傍坐摩訶菩提樹摩
訶菩提樹去貝多樹二里於此樹下七日思惟道成
摩兵試佛釋氏西域記曰尼連水南流注恒水水西
有佛樹佛於此苦行日食糜六年西去城五里許樹
東河上即佛入水浴處東上岸尼拘律樹下坐修舍

女上糜於此於是西渡水於六年樹南貝多樹下坐
降魔得佛也佛圖調曰佛樹中枯其來時更生枝葉
竺法維曰六年樹去佛樹五里書其異也法顯從此
東南行還巴連弗邑順恒水西下得一精舍名曠野
佛所住處復順恒水西下到迦尸國波羅柰城竺法
維曰波羅柰國在迦維羅衛國南千二百里中間有
恒水東南流佛轉法輪處在國北二十里樹名春浮
維摩所處也法顯曰城之東北十里許即康野苑本

辟支佛住此常有野鹿栖宿故以名焉法顯從此還居巴連弗邑又順恒水東行其南岸有瞻婆大國釋氏西域記曰恒曲次東瞻婆國城南有卜佉蘭池池水恒在北佛下說戒處也恒水又逕波麗國即是佛外祖國也法顯曰恒水又東到多摩梨耆國即是海口也釋氏西域記曰大秦一名梨耆康泰扶南傳曰從迦那調洲西南入大灣可七八百里乃到支扈黎大江口渡江逕西行極大秦也又云發拘利口入大

灣中正西北入可一年餘得天竺江口名恒水江口

有國號擔袂屬天竺遣黃門字興為擔袂王釋氏西

域記曰恒水東流入東海蓋二水所注兩海所納自

為東西也

周氏嬰庖林曰崑崙墟河出東北阼恒出西北隅恒繞城西域達于大秦河入中國

注于東海河流小渚絕不通波善長叙恒于河之下蓋因崑崙而及之乎若其括地脈川細奇甄異六合之外宛在目前三竺之流如灤足下神州地志斯為最疎矣然皆躡法顯之行踪想恒流之洞然其間水陸未辨道里難明計所差池厥類亦衆予為兩兩較之法顯傳云渡新頭河至毗荼國東南行八十由延到摩頭羅從此東南行十八由延到僧迦施國又東南七由延到罽賓饒夷城城接恒水渡恒水又南行

三由延到呵梨林又東南行十由延到沙祇又南行
八由延到舍衛城又東南行十二由延到那毗迦又
東南行減二由延到迦維羅衛又東行五由延到藍
莫又東行十九由延到拘夷那竭又東南行由延到
毗舍離又東行四由延到五河合口渡河南下一由
延到巴連弗邑從此東南行九由延到小孤石山又
西行二由延到王舍新城從此西行四由延到迦耶
城復南行二十里到六年城從此還向巴連弗邑此
皆顯踰原越陞瞻曦曷以遐徂尋途投扉觸風塵而
備歷者也水經注因之乃云新頭河逕中天竺毗荼
國又逕摩頭羅渾流恒水恒水東南流逕拘夷那竭
國又東逕毗舍利城又東南流逕僧迦施又東逕罽
賓饒夷又東南逕沙祇恒水又東南逕迦維羅衛北
又東逕藍莫恒水又東至五河合口度河南下一由
延到巴連弗邑恒水又東南逕小孤石山又西逕王
舍新城又西逕伽耶城南二十里到六年樹法顯從

此東南行還向巴連弗邑皆以原野之遙征為波流
之所屆焉且拘夷毗舍在藍莫左水經注乃居伽施
之西舍衛毗伽去伽維北劣一由延恒水若南必逕
茲土而善長遺之度雪山過沙河經烏菴佛足跡驪
衣石即得陀衛尸羅國水經注乃置葱嶺之東黃河
之所逕凡此俱與法顯傳大致相違若法顯東西跋
涉所約各幾由延者其中定多瑰異直為不能具述
善長亦失綱羅都無補綴但改云恒水東南流耳恒
水又東逕耳佳麗僧城叙多支複空荒夷野事極寂
寥千里而遙一言便畢不令好古之士恨作者之疎
乎又法顯從六年樹還巴連弗順恒水西下至曠野
波羅柰蓋循西岸行也又還巴連弗順恒水東行得
瞻波梨帝蓋沿東澍去也此邑恒水下流左右諸國
盡此矣水經注乃先於巴連弗處云恒水又東南逕
小孤石山又西逕王舍伽耶廣衰討之安得有兩恒
河乎是知縱翰畧記者忘準之地道快意成書者罔

研乎舊史予今證其諸長拾其一短俾積壁崑圖一片是衛武之圭濯錦江流數尺乃楚丘之服若曰鴻致自有所指歸細趣不足以擊釋氏論佛圖調列山難言立之旨吾亦烏乎測之哉

海經曰西海之南流沙之濱赤水之後黑水之前有大山名崑崙又曰鍾山西六百里有崑崙山所出五水祖以佛圖調傳也又近推得康泰扶南傳傳崑崙山正與調合如傳自交州至天竺最近泰傳亦知阿耨達山是崑崙山釋云賴得調傳豁然為解乃宣為西域圖以語法汰法汰以常見怪謂漢來諸名人不

應河在敦煌南數千里而不知崑崙所在也釋云復
書曰按穆天子傳穆王於崑崙側瑤池上觴西王母
云去宗周溷澗萬有一千一百里何得不如調言子
今見泰傳非為前人不知也而今以後乃知崑崙山
為無熱丘何云乃胡國外乎余考釋氏之言未為佳
證穆天子竹書及山海經皆埋緼歲久編韋稀絕書
策落次難以緝綴後人假合多差遠意至若訪地脈
川不與經符驗程準途故自無會釋氏不復根其艱

歸之鴻致陳其細趣以辨其非非所安也今按山海經曰崑崙虛在西北帝之下都崑崙之虛方八百里高萬仞上有木禾面有九井以玉為檻面有九門門有開明獸守之百神之所在郭璞曰此自別有小崑崙也又按淮南之書崑崙之上有木禾珠樹玉樹瓊樹不死樹在其西沙棠琅玕在其東絳樹在其南碧樹瑤樹在其北傍有四百四十門門間四里里間九純純丈五尺傍有九井玉橫維其西北隅北門開以

納不周之風傾宮旋室縣圃涼風樊桐在崑崙閭闔
之中是其䟽圃䟽圃之池浸之黃水黃水三周復其
源是謂丹水飲之不死河水出其東北陬赤水出其
東南陬洋水出其西北陬弱水出自窮石至于合黎
凡此四水帝之神泉以和百藥以潤萬物崑崙之丘
或上倍之是謂涼風之山登之而不死或上倍之是
謂玄圃之山登之乃靈能使風雨或上倍之乃維上
天登之乃神是謂太帝之居禹乃以息土填鴻水以

為名山掘崑崙虛以為下地高誘曰地或作池

全氏祖望曰七

字注中注本雙行夾寫後人傳抄連作大字下文多有之

山海經曰不周之山不

周之北門以納不周之風則以髣髴近浮圖調之說

阿耨達六水葱嶺于闐二水之限與經史諸書全相

乖異又按十州記崑崙山在西海之戌地北海之亥

地去岸十三萬里有弱水周迴繞匝山東南接積石

圃西北接北戶之室東北臨大活之井西南近承淵

之谷此四角大山寔崑崙之支輔也積石圃南頭昔

西王母告周穆王去咸陽三

朱氏謀瑋箋曰
十州記作四

十六萬

里山高平地三萬六千里上有三角面方廣萬里形
如偃盆下狹上廣故曰崑崙山有三角其一角正北
千辰星之輝名曰閼風巔其一角正西名曰玄圃臺
其一角正東名曰崑崙宮其處有積金為天墉城面
方千里城上安金臺五所玉樓十二其北戶出承淵
山又有墉城金臺玉樓相似如一淵精之闕光碧之
堂瓊華之室紫翠丹房景雲燭日朱霞九光西王母

之所治真官仙靈之所宗上通璿璣元氣流布五常
玉衡理九天而調陰陽品物羣生希奇特出皆在於
此天人濟濟不可具記上有金臺玉闕亦元氣之所
含天帝君所治處也考東方朔之言及經五萬里之
文難言浮圖調康泰之傳是矣六合之內水澤之藏大
非為巨小非為細存非為有隱非為無其所苞者廣
矣於中同名異域稱謂相亂亦不為寡至如東海方
丈亦有崑崙之稱西州銅柱又有九府之治東方朔

十州記曰方丈在東海中央東西南北岸相去正等
方丈面各五千里上專是羣龍所聚有金玉琉璃之
宮三天司命所治處羣仙不欲升天者皆往來也張
華叙東方朔神異經曰崑崙有銅柱焉其高入天所
謂天柱也圍三千里員周如削下有迴屋仙人九府
治上有大鳥名曰希有南向張左翼覆東王公右翼
覆西王母背上小處無羽一萬九千里西王母歲登
翼上之東王公也故其柱銘曰崑崙銅柱其高入天

員周如削膚體美焉其鳥銘曰有鳥希有綠赤煌煌
不鳴不食東覆東王公西覆西王母王母欲東登之
自通陰陽相須唯會益工遁甲開山圖曰五龍見教
天王被跡望在無外柱州崑崙山上榮氏注云五龍
治在五方為五行神五龍降天皇兄弟十二人分五
方為十二部法五龍之跡行無為之化天下仙聖治
在柱州崑崙山上無外之山在崑崙東南一萬二千
里五龍天王皆出此中為十二時神也山經曰崑崙

之丘實惟帝之下都其神陸吾是司天之九部及帝
之囿時然六合之內其苞遠矣幽致沖妙難本以情
萬像遐淵思絕根尋自不登兩龍於雲輶騁八駿於
龜途等軒轅之訪百靈方大禹之集會計儒墨之說
孰使辨哉

又出海外南至積石山下有石門河水冒以西南流

全氏曰杜

君卿之譏水經誠有過者胡東樵欲為水經護法而以
為錯簡以愚考之則亦非也水經開卷數語純引山經
蓋以為河水緣起葱嶺而下則申明乃開卷數語之釋
文此其行文之拙非後人所竄易也但其所引山經亦

有甚不同者則可怪也萬斯同曰山海經河水出崑崙之東北以行其北西南入于渤海水經則謂東南入于渤海山海經積石之下有石門河水冒以西流水經則謂冒以西南流道元竟不能辨正孰謂此書為刊之定論者况河自鹽澤以下皆東流也

山海經曰河水出渤海又海水西北入禹所導積石

山全氏曰按山海經本文曰河水西南入渤海又出海外即西而北入禹所導積石山今是注所引非

完山在隴西郡河闕縣西南羌中余考羣書咸言河

出崑崙重源潛發淪于蒲昌出于海水故洛書曰河自崑崙出于重野謂此矣逕積石而為中國河故成

公子安大河賦曰覽百川之宏壯莫尚美於黃河潛

崑崙之峻極出積石之嵯峨釋氏西域傳曰河自蒲

昌潛行地下南出積石而經文在此似如不比積石

宜在蒲昌海下矣

杜氏佑通典曰按水經云崑崙虛在西北去嵩高五萬里地之中也

其高萬一千里河水出其東北阪屈從其東南流入于渤海又出海外南至積石山下有石門又南入葱嶺

山又從葱嶺出而東北流其源出于闐國南山北流與葱嶺所出河合又東注蒲昌海又東入塞過敦

煌酒泉張掖郡南又東過隴西河關縣北云云按水經晉郭璞注三卷後魏酈道元注四十卷皆不著所

撰者名氏亦不知何代之書佑謂二子博瞻解釋固應精當詳水經所作殊為詭誕全無憑據水經所云

河出崑崙山者宜出于禹本紀山海經所云南入葱嶺及出于閼南山者出于漢書西域傳而鄯道元都不詳正所注河之發源亦引禹紀山經釋法明遊天竺記釋氏西域記所注南入葱嶺一源出于閼南山合流于蒲昌海雖約漢書亦不尋究又水經云出海外南至積石山下有石門然後南流入葱嶺據此則積石山當在葱嶺之北又云入塞過敦煌酒泉張掖郡南並今郡地也夫山水地形固有定體自葱嶺于閼之東敦煌張掖之間華人往來非少從後漢至大唐圖籍相承注記不絕大磧互數千里未又桑田碧海之變陵遷谷移之談此處豈有河流纂集者不詳斯甚又按禹導河積石者堯時洪水下人昏墊禹所開決本救人患積石之西砂碛之地河流小地勢復高不為人患不惡疎鑿以此施功發跡自積石山而東則今西平郡龍支縣界山是也固無禹理水之功自葱嶺之北其本紀灼然荒唐撰經者取為準的班

固云言九州山川者尚書近之矣誠為愜當其後漢書西域傳云河水一源出蔥嶺一源出于闐合流東注蒲昌海皆以潛流地下南出積石為中國河云比禹紀山經猶校附近終是紕繆按此宜唯憑張騫使大夏見兩道水從葱嶺于闐合流入蒲昌海其于闐出美玉所以騫傳遂云窮河源也按古圖書名河所出曰崑崙山疑所謂古圖書即禹本紀以于闐山出玉乃謂之崑崙即所出便云是河也窮究諸說悉皆繆悞孟堅又云禹貢云導河自積石遂疑潛流從此方出且漢時羣羌種類雖多不相統一未為強國漢家或未嘗遣使詣西南羌中或未知自有河也寧有吐蕃中河從西南數十里向東北流見于積石山下河相連聘使涉歷無不言之吐蕃自云崑崙山在國中西南則河之所出也又按尚書云織皮崑崙析支渠叟西戎即叙又范曄後漢書云西羌在漢金城郡之西南濱于賜支續漢書曰河關西千餘里河曲羌

欽定四庫全書

卷一

謂之賜支蓋析支也然則析支在積石之西是河之上流明矣崑崙在吐蕃中當亦非繆而不謂河之本源乃引蔥嶺于闐之河謂從蒲昌海伏流數千里至積石方出斯又班生之所未詳也佑以水經僻書代人多不知覩或有好事者于諸書中見有引據謂其審正此殊未之精也不揆淺昧考諸家之說辨千古訛舛是故曲折言之胡氏渭禹貢錐指解之曰按水經叙西域兩源較漢書尤為明脩惟是積石一山錯簡在渤海之下蔥嶺之上遂來後人之彈射并其全經而疑之而不知此非本文乃庸妄人之所竄易也彼見山海經云河水出渤海西北入積石山遂以此經海外之海為渤海殊不知渤海之亦名蒲昌海也彼見此經云河水東入塞過敦煌酒泉張掖郡南遂謂積石距敦煌遙遠而渤海最近故移積石于渤海之下使渤海與敦煌相接殊不思三郡界中實無河也蓋漢世河關以西皆為羌中地河水所經人莫能

觀故聊假三郡之南以表之非真謂河自鹽澤入玉
門陽關也杜佑不察此意而以為纂集之不詳固宜
矣若夫道元之注惟勃海以上博引釋氏怪誕之說
甚覺無謂至葱嶺山以下發明頗多其所言崑崙虛
也曰淺見未聞非所詳究其言積石也曰宜在蒲昌
海下其言葱嶺河也曰河源潛發分為二水其言蒲
昌海也曰洄流電轉為隱淪之脈正其繆而補其闕
亦可謂精審之至矣杜佑詆水經并詆道元豈通論
哉又曰此渤海當在葱嶺西塞外凡大澤謂之海渤
海即蒲昌雷翥牢蘭之類非真海也又出海外二十
字鄭意以此為錯簡蓋以下文南入葱嶺觀之則積
石反在葱嶺之北必無是理也今移在後又東注于
渤澤之下則自崑崙而葱嶺而蒲昌而積石原委秩
然方位悉當矣一清按通典為學人所尊信其譏水
經以為纂集之不詳其摘鄭注云都不詳正又云亦
不尋究是於本書尚未通覽僅撮割數言以逞其私

說而其所指積石乃是隋置河源郡唐置積石軍之地誤以龍支之積石當禹貢之積石曾不悉在塞外西南羌中者大積石也在枹罕西北者小積石也地理志括地志之文可覆按也東樵之言可稱諍友

水經注釋卷一

欽定四庫全書

水經注釋卷二

仁和趙一清撰

河水二

河水

一清按凡經文次篇之首有某水二字皆後人所加蓋漢人作經自為一篇豈能逆料酈氏為之注

而先于每卷交割之處增二字以別之哉或酈注既成用二字為提掇則可耳然非經之舊也此卷首列河水二字謂重源之再見也其義例如此

又南入葱嶺山

河水重源有三非唯二也一源西出身毒之國

禹貢雖指

曰身毒當作捐毒漢書捐毒國王治犍敦谷東至都
護治所八百六十一里至疎勒南與蔥嶺屬無人民
西上蔥嶺則休循也西北至大宛千三百里北與烏
孫接先儒以為即身毒非也張騫曰身毒國在大夏
東南可數千里有蜀物去蜀不遠大夏即大月氏所
居之地也今捐毒在大月氏之東北西去休循二百
餘里豈身毒乎

鄭注蓋承其誤

蔥嶺之上西去休循二百餘里皆故

塞種也南屬蔥嶺高千里西河舊事曰蔥嶺在敦煌

西八千里其山高大上生蔥故曰蔥嶺也河源潛發

其嶺分為二水一水西逕休循國南在蔥嶺西郭義

恭廣志曰休循國居蔥嶺其山多大蔥又逕南兜國

北北接休循西南去罽賓國三百四十里河水又西
逕罽賓國北月氏之破塞王南君罽賓治循鮮城土
地平和無所不有金銀珍寶異畜奇物踰于中夏大
國也山嶽有大頭痛小頭痛之山赤土身熱之阪人
畜同然河水又西逕月氏國南治監氏城其俗與安
息同匈奴冒頓單于破月氏殺其王以頭為飲器國
遂分遠過大宛西居大夏為大月氏其餘小衆不能
去者共保南山羌中號小月氏故有大月氏小月氏

之名也又西逕安息國南城臨媯水地方數千里最大國也有商賈車船行旁國畫革旁行為書記也河水與蜺羅跋禰水同注雷翥海釋氏西域記曰蜺羅跋禰出阿耨達山

西句之北全氏曰之北猶言如此

逕于闐國

漢書西域傳曰于闐以西水皆西流注于西海又西逕四大塔北釋法顯所謂紇尸羅國漢言截頭也佛為菩薩時以頭施人故因名國國東有投身餒餓虎處皆起塔又西逕健陀衛國北是阿育王子法益所

治邑佛為菩薩時亦於此國以眼施人其處亦起大塔又有弗樓沙國天帝釋變為牧牛小兒聚土為佛塔法王因而成大塔所謂四大塔也法顯傳曰國有佛鉢月氏王大興兵衆來伐此國欲持鉢去置鉢象上象不能進更作四輪車載鉢八象共牽復不進王知鉢緣未至於是起塔留鉢供養鉢容二斗雜色而黑多四際分明厚可二分甚光澤貧人以少華投中便滿富人以多華供養正復百千萬斛終亦不滿佛

圖調曰佛鉢青玉也受三斗許彼國寶之供養時願
終日香花不滿則如言願一把滿則亦便如言又按
道人竺法維所說佛鉢在大月支國起浮圖高三十
丈七層鉢處第二層金絡絡鑠縣鉢鉢是青石或云
縣鉢虛空須菩提置鉢在金机上佛一足跡與鉢共
在一處國王臣民悉持梵香七寶璧玉供養塔跡佛
牙袈裟頂相舍利悉在弗樓沙國釋氏西域記曰犍
陀越王城西北有鉢吐羅越城佛袈裟王城也東有

寺重復尋川水西北十里有河步羅龍淵佛到淵上
浣衣處浣石尚存其水至安息注雷翥海又曰犍陀
越西西海中有安息國竺芝扶南記曰安息國去私
訶條國二萬里國土臨海上即漢書天竺安息國也
戶近百萬最大國也漢書西域傳又云犁靬條支臨
西海長老傳聞條支有弱水西王母亦未嘗見自條
支乘水西行可百餘日近日所入也或河水所通西
海矣故涼土異物志曰葱嶺之水分流東西西入大

海東為河源禹紀所云崑崙者焉張騫使大宛而窮
河源謂極於此而不達於崑崙者也河水自葱嶺分
源東逕伽舍羅國釋氏西域記曰有國名伽舍羅逝
此國狹小而總萬國之要道無不由城南有水東北
流出羅逝西山山即葱嶺也逕岐沙谷出谷分為二
水一水東流逕無雷國北治盧城其俗與西夜子合
同又東流逕依耐國北去無雷五百四十里俗同子
合又東流逕蒲犂國北治蒲犂谷北去疎勒五百五

十里俗與子合同河水又東逕皮山國北治皮山城

西北去莎車三百八十里

禹貢雖指曰按自罽賓至陀衛皆西流注西海之水

水經乃拙手所作提挈不清賴有酈注為之發明人始知有葱嶺之河東西分流不然則似河水自葱嶺西行至陀衛而復東行以入葱嶺大惑不解矣一清按水經世傳脫誤兼之經注混淆此篇尤甚一為改正眼界豁然覺東樵之言猶為唐突前人也

其一源出于闐國南山北流與葱嶺河合東注蒲昌海
河水又東與于闐河合南源導于闐南山俗謂之仇
摩置自置北流逕于闐國西治西城土多玉石西去

皮山三百八十里東去陽關五千餘里釋法顯自徇
夷西南行路中無人民沙行艱難所逕之苦人理莫
比在道一月五日得達于闐其國殷庶民篤信多大
乘學威儀齊整器鉢無聲城南一十五里有利刹寺
中有石鞞石上有足跡彼俗言是辟支佛跡法顯所
不傳疑非佛跡也又西北流注于河即經所謂北注
蔥嶺河也南河又東逕于闐國北釋氏西域記曰河
水東流三千里至于闐屈東北流者也漢書西域傳

曰于闐已東水皆東流南河又東北逕扞彌國北治
扞彌城西去于闐三百九十里南河又東逕精絕國
北西去扞彌四百六十里南河又東逕且末國北又
東右會阿耨達大水釋氏西域記曰阿耨達山西北
有大水北流注牢蘭海者也其水北流逕且末南山
又北逕且末城西國治且末城西通精絕二千里東
去鄯善七百二十里種五穀其俗畧與漢同又曰且
末河東北流逕且末北又流而左會南河會流東逝

通為注賓河注賓河又東逕鄯善國北治伊循城故樓蘭之地也樓蘭王不恭於漢元鳳四年霍光遣平樂監傅介子刺殺之更立後王漢又立其前王質子尉屠耆為王更名其國為鄯善百官祖道橫門王自請天子曰身在漢久恐為前王子所害國有伊循城土地肥美願遣將屯田積粟令得依威重遂置田以鎮撫之敦煌索勒字彥義有才畧刺史毛奕表行貳師將軍

全氏曰貳師之官後漢所無且其時刺史秩卑不得表行將軍也何氏曰其事無可考將

酒泉敦煌兵千人至樓蘭屯田起白屋召鄯善焉耆
龜茲三國兵各千橫斷注賓河河斷之日水奮勢激
波凌冒隄勦厲聲曰王尊建節河隄不溢王霸精誠
呼沱不流水德神明古今一也勦躬禱祀水猶未滅
乃列陣被仗鼓譟謹叫且刺且射大戰三日水乃迴
減灌浸沃衍胡人稱神大田三年積粟百萬威服外
國其水東注澤澤在樓蘭國北扞泥城其俗謂之東
故城去陽關千六百里西北去烏壘千七百八十五

里至墨山國千八百六十五里西北去車師千八百
九十里土地沙鹵少田仰穀傍國國出玉多葭葦檉
柳胡桐白草國在東垂當白龍堆之水草常主發導
負水擔糧迎送漢使

一清按此處有脫文

故彼俗謂是海為牢

蘭海也釋氏西域記曰南河自于闐於東北三千里
至鄯善入牢蘭海者也北河自岐沙東分南河即釋
氏西域記所謂二支北流逕屈茨徇夷禪善入牢蘭
海者也北河又東北流分為二水枝流出焉北河自

踈勒逕流南河之北釋氏西域記曰葱嶺以東南北
有山相距千餘里東西六千里河出其中暨于溫宿
之南左合枝水上承北河于踈勒之東西北流逕踈
勒國南又東北與踈勒北山水合水出北谿東南流
逕踈勒城下漢書西域傳曰南去莎車五百六十里
有市列西當大月氏大宛康居道釋氏西域記曰國
有佛俗牀赤真檀木作之方四尺王於宮中供養漢
永平十八年耿恭以戊己校尉為匈奴左鹿蠡王所

逼恭以此城側澗傍水自金蒲遷居此城匈奴又來
攻之壅絕澗水恭於城中穿井深一十五丈不得水
吏士渴乏笮馬糞汁飲之恭乃仰天歎曰昔貳師拔
佩刀刺山飛泉湧出今漢德神明豈有窮哉整衣服
向井再拜為吏士禱之有頃水泉奔出衆稱萬歲乃
揚水以示之虜以為神遂即引去後車師叛與匈奴
攻恭食盡窮困乃煮鎧弩食其筋革恭與士卒同生
死咸無二心圍恭不能下關寵上書求救建初元年

明帝

一清按建初是章帝年號鄧氏誤記也後漢書耿恭傳云初聞寵上書求救時肅宗新即位則

明帝字為誤無疑

納司徒鮑昱之言遣兵救之至柳中以校

尉關寵分兵入高昌壁攻交河城車師降遣恭軍吏
范羌將兵二千人迎恭遇大雪丈餘僅能至城中夜
聞兵馬大恐羌遙呼曰我范羌也城中皆稱萬歲開
門相持涕泣尚有二十六人衣履穿決形容枯槁相
依而還北河又東逕莎車國南治莎車城西南去蒲
犂七百四十里漢武帝開西域屯田於此有鐵山出

青玉北河又東逕溫宿國南治溫宿城土地物類與

鄯善同北至烏孫赤谷六百一十里東通姑墨二百

七十里於此枝河右入北河北河又東逕姑墨國南

入姑墨川水注之水導姑墨西北赤沙山東南流逕

姑墨國西治南城南至于闐馬行十五日土出銅鐵

及雌黃其水又東南流右注北波河

一清按北波河謂北循河也章

懷後漢書注曰波傍也音訖又西域傳作波章又東

懷注曰循河曰陂音波義反史記曰陂山通道

逕龜茲國南又東左合龜茲川水有二源西源出北

大山南釋氏西域記曰屈茨北二百里有山夜則火
光晝日但煙人取此山石炭冶此山鐵恒充三十六
國用故郭義恭廣志曰龜茲能鑄冶其水南流逕赤
沙山釋氏西域記曰國北四十里山上有寺名雀離
大清淨又出山東南流枝水左派焉又東南水流三
分右二水俱東南流注北河又東川水逕龜茲東北
歷赤沙積梨南流枝水右出西南入龜茲城音屈茨
也

全氏曰四字注中注

故延城矣西去姑墨六百七十里川水

又東南流逕于輪臺之東也昔漢武帝初通西域置校尉屯田于此搜粟都尉桑弘羊奏言故輪臺以東地廣饒水草可溉田五千頃以上其處溫和田美可益通溝渠種五穀收穫與中國同時匈奴弱不敢近西域於是徙莎車相去千餘里即是臺也其水又東南流右會西川枝水水有二源俱受西川東流逕龜茲城南合為一水水間有故城蓋屯校所守也其水東南注東川水東川水又東南逕烏壘國南治烏壘城

西去龜茲三百五十里東去玉門陽關二千七百三十
十八里與渠犂田官相近土地肥饒於西域為中故
都護治焉漢使持節鄭吉并護北道故號都護都護
之起自吉置也其水又東南注大河大河又東右會
敦薨之水其水出焉耆之北敦薨之山在匈奴之西
烏孫之東山海經曰敦薨之水出焉而西流注于渤
澤出于崑崙之東北隅實惟河源者也二源俱導西
源東流分為二水西南流出於焉耆之西經流焉耆

之野屈而東南流注於敦薨之渚右水東南流又分
為二左右焉耆之國城居四水之中在河水之州治
員渠城西去烏壘四百里南會兩水同注敦薨之浦
東源東南流分為二水但澗瀾雙引洪湍濬發俱東
南流逕出焉耆之東導于危須國西國治危須城西
去焉耆百里又東南流注于敦薨之藪川流所積潭
水斯漲溢流為海史記曰焉耆近海多魚鳥東北隔
大山與車師接敦薨之水自西海逕尉犁國國治尉

犂城西去都護治所三百里北去焉耆百里其水又西出沙山鐵關谷又西南流逕連城引注裂以為田桑弘羊曰臣愚以為連城以西可遣屯田以威西國即此處也其水又屈而南逕渠犂國西故史記曰西有大河即斯水也又東南流逕渠犂國治渠犂城西北去烏壘三百三十里漢武帝通西域屯渠犂即此處也南與精絕接東北與尉犂接又南流注于河山海經曰敦薨之水西流注于渤澤盖亂河流自西南

注也河水又東逕墨山國南治墨山城西至尉犁二

百四十里

一清按漢書西域傳作山國云鄯善國西北去都護治所千七百八十五里至山國

千三百六十五里師古曰此國山居故名山國也又云山國去長安七千一百七十里東南與鄯善且末接師古曰常在山下居不為城治也漢書脫去墨字師古遽以臆解之更不識所居何山所治何城觀鄯注甚是分明可補史傳之缺文正小顏之曲說

河水又東逕賓城南又東

逕樓蘭城南而東注蓋撥田士所屯故城禪國名耳

河水又東注于泐澤即經所謂蒲昌海也水積鄯善

之東北龍城之西南龍城故姜賴之虛胡之大國也

蒲昌海溢溢覆其國城基尚存而至大晨發西門莫
達東門澮其崖岸餘溜風吹稍成龍形西面向海因
名龍城地廣千里皆為鹽而剛堅也行人所逕畜產
皆布羶卧之掘發其下有大鹽方如巨枕以次相累
類霧起雲浮寡見星日少禽多鬼怪西接鄯善東連
三沙為海之北隘矣故蒲昌亦有鹽澤之稱也山海
經曰不周之山臨彼岳崇之山東望渤海河水之所
潛也其源渾渾泡泡者也東去玉門陽關一千三百

里全氏曰按郭璞注去玉門陽關三百餘里與漢書西域傳合也廣袤三百里其水

澄渟冬夏不減其中洄湍電轉為隱淪之脈當其深流之上飛禽奮翮於霄中者無不墜於淵波矣即河水之所潛而出於積石也

又東入塞過敦煌酒泉張掖郡南

河自蒲昌有隱淪之證並間關入塞之始自此經當求實致也河水重源又發于西塞之外出于積石之山山海經曰積石之山其下有石門河水冒以西南

流是山也萬物無不有焉禹貢所謂導河自積石也
山在西羌之中燒當所居也延熹二年西羌燒當犯
塞護羌校尉段熲討之追出塞至積石山斬首而還
司馬彪曰西羌者自析支以西濱於河首左右居也
河水屈而東北流逕於析支之地是為河曲矣應邵
曰禹貢析支屬雍州在河關之西東去河關千餘里
羌人所居謂之河曲羌也東北逕歷敦煌酒泉張掖

南一清按漢書地理志敦煌郡下云有蒲昌海冥安
縣南籍端水出南羌中西北入其澤溉民田應邵

曰冥水出北入其澤龍勒縣氏置水出南羌中東北
入澤溉民田效穀縣師古曰本魚澤障也桑欽說孝
武元封六年濟南崔不意為魚澤尉教力田以勤效
穀因立為縣名淵泉縣師古曰闕駟曰地多泉水故
以為名廣至縣宜禾都尉治昆侖障酒泉郡應邵曰
其水若酒故曰酒泉師古曰舊俗傳云城下有金泉
泉味如酒祿福縣呼蠶水出南羌中東至會水入羌
谷會水縣北都尉治偃泉障東部都尉治東部障
闕駟曰泉水所會故曰會水樂涇縣說文曰涇濡也
酒泉有樂涇又曰涇涇溢也今西河朔方言謂沸溢
為涇涇張振郡鰲得縣千金渠西至樂涇入澤中羌
谷水出羌中東北至居延入海過郡二行二千一百
里刪丹縣桑欽以為導弱水自此西至酒泉合黎居
延縣居延澤在東北古文以為流沙都尉治此即三
郡之應劭地理風俗記曰敦煌一清按漢志敦煌郡
水也應劭地理風俗記曰敦煌下注引應劭曰敦煌大

也煌盛也與酒泉張掖俱是仲瑗之說則此不應獨遺之劉昭郡國志補注敦煌郡下引耆舊記曰國當乾位地列艮虛水有縣泉之神山有鳴沙之酒泉其異川無蛇虺澤無兕虎華戎所交一都會也

水甘若酒味故也張掖言張國臂掖以威羌狄說文曰郡制天子地方千里分為百縣縣有四郡故春秋傳曰上大夫縣下大夫郡至秦始皇置三十六郡以監縣矣從邑君聲釋名曰郡羣也人所羣聚也黃義仲十三州記曰郡之言君也改公侯之封而言君者至尊也郡守專權君臣之禮彌崇今郡字君在其左邑

在其右君為元首邑以載民故取名於君謂之郡漢
官曰秦用李斯議分天下為三十六郡凡郡或以列
國陳魯齊吳是也或以舊邑長沙丹陽是也或以山
陵太山山陽是也或以川原西河河東是也或以所
出金城城下得金酒泉泉味如酒豫章樟樹生庭雁
門雁之所育是也或以號令禹合諸侯大計東治之
山會計國名會稽是也

全氏曰元文大計東治之山
國名會稽是注所引有舛謬

又東治之名更在會稽之後蓋自區治
死始有之仲瑗反以為古地名亦誤也

河逕其南而

纏絡遠矣河水又東自河曲逕西海郡南漢平帝時

王莽秉政欲耀威德以服遠方諷羌獻西海之地置

西海郡而築五縣焉周海亭燧相望莽篡政紛亂郡

亦棄廢

全氏曰按五縣謂修遠監羌興武罕虜順磔也據莽傳居攝二年西羌怨莽奪其地攻走

西海太守程永

河水又東逕允川而歷大榆小榆谷北羌迷

唐鍾存所居也永元五年貫友代聶尚為護羌校尉

攻迷唐斬獲八百餘級收其熟麥數萬斛於逢留河

上築城以盛麥且作大船於河峽作橋渡兵迷唐遂

逯依河曲永元九年迷唐復與鍾存東寇而還十年

謁者王信耿譚西擊迷唐降之詔聽還大小榆谷迷

唐種人

一清按此處似多種人二字後漢書西羌傳云和帝令迷唐將其種人還大小榆谷迷唐

以為漢作河橋兵來無常故地不可復居辭以飢餓不能遠出遂復背叛云云則背叛者止迷唐耳故下有與羌為讐種人與官兵擊之之文擊之者擊迷唐也豈有種人背叛種人復擊之之事乎其云與羌為讐據後漢書云迷唐復還賜支河曲初累姐種附漢迷唐怨之遂擊殺其酋豪由是與諸種為讐鄭注剛落不存故以漢造河橋兵來無時故地不可居復叛難曉耳

居河曲與羌為讐種人與官兵擊之允川去迷唐數

十里營止遣輕兵挑戰因引還迷唐追之至營因戰
迷唐敗走於是西海及大小榆無復聚落隕麋相曹
鳳上言建武以來西戎數犯法常從燒當種起所以
然者以其居大小榆谷土地肥美又近塞內與諸種
相傍南得鍾存以廣其衆北阻大河因以為固又有
西海魚鹽之利緣山濱河以廣田畜故能彊大常雄
諸種今黨援沮壞親屬離叛其餘勝兵不過數百宜
及此時建復西海郡縣規固二榆廣設屯田隔塞羌

胡交關之路殖穀富邊省轉輸之役上拜鳳為金城西部都尉遂開田二十七部列屯夾河與建威相首尾後羌反遂罷按段國沙州記吐谷渾於河上作橋謂之河厲長一百五十步兩岸壘石作基陞節節相次大木從橫更鎮壓兩邊往來相去三丈並大材以板橫次之施鈎欄甚嚴飾橋在清水川東也

又東過隴西河關縣北

全氏曰施廷樞曰水經全用後漢地名不然河關故屬金城郡

也上曲陽之稱中山亦其証因河關之屬隴西而知水經為東京之作義最精密予嘗謂山經亦成于後漢故

其稱河關亦洮水從東南來流注之

全氏曰道元歷叙河關一帶大河所

會之水而以洮水終之舊本錯誤以注為經于是胡渭疑洮水不應再見反改河關下之經文洮水為澆水以避之不知河關一帶之水通名洮河非別有所謂澆水也胡氏畢生治水經乃有此謬

河水又逕沙州北段國曰澆河西南一百七十里有

黃沙沙南北一百二十里東西七十里西極大楊州

望黃沙猶若人委干糒于地都不生草木蕩然黃沙

周迴數百里沙州於是取號焉地理志曰漢宣帝神

爵二年置河關縣

齊氏召南曰今本漢志是文在破羌縣下豈誤移于河關與抑俱有

而一存一脫與全氏曰按道元注于破羌縣亦有此語而所引是應劭說則知此是班固河關之本注而應劭又再注之于破羌今本漢書于河關下失去元注于破羌下復脫應劭曰三字猶幸是文有可考耳

蓋取河之關塞也風俗通曰百里曰同總名為縣縣

元也首也從系倒首與縣易偏矣言當元靜平徭役也釋名又曰縣縣也縣於郡矣黃義仲十三州記曰

縣弦也弦以貞直言下體之居鄰民之位不輕其誓

施繩用法不曲如弦弦聲近縣故以取名今縣字在

半也一清按此句疑有誤漢高帝六年令天下縣邑城張晏曰

令各自築其城也河水又東北流入西平郡界左合
二川南流入河又東北濟川水注之水西南出濫瀆
東北流入大谷謂之大谷水北逕澆河城西南北流
注于河河水又東逕澆河故城北有二城東西角倚
東北去西平二百二十里宋少帝景平中拜吐谷渾
阿豺一清按通鑑宋紀作阿柴為安西將軍澆河公即此城也河
水又東北逕黃川城河水又東逕石城南左合北谷
水昔段熲擊羌於石城投河墜坑而死者八百餘人

即於此也河水又東北逕黃河城南西北去西平二

百一十七里河水又東北逕廣達城北

全氏曰先司空公曰廣達

即廣威音同字異字文蓋取此城以名縣

又合烏頭川水水發遠川引納

支津北逕城東而北流注于河河水又東逕邯川城

南城之左右歷谷有二水

一清按後漢書馬武傳章懷注曰此水分流謂之東

西邯也

導自北山南逕邯亭注于河河水又東臨津谿

水注之水自南山北逕臨津城西而北流注于河

水又東逕臨津城北白土城南十三州志曰左南津

西六十里有白土城城在大河之北而為緣河濟渡

之處

全氏曰按胡三省曰漢左南津之白土城晉置白土縣屬金城郡其漢上郡之白土縣乃後魏

新平郡之白土縣不可湮也

魏涼州刺史郭淮

何氏曰據三國志淮領雍州非涼州

刺史蓋史傳之畧

破羌遮塞於白土即此處矣河水又東左

會白土川水水出白土城西北下東南流逕白土城

北又東南注于河河水又東北會兩川右合二水參

差夾岸連襄負嶮相望河北有層山山甚靈秀山峰

之上立石數百丈亭亭桀豎競勢爭高遠望參參若

攢圖之託霄上其下層巖峭舉壁岸無階縣巖之中

多石室焉室中若有積卷矣而世士罕有津逮

何氏白歸

太僕家鈔
本作津造

者因謂之積書巖巖堂之內每時見神人

往還矣蓋鴻衣羽裳之士鍊精餌食之夫耳俗人不

悟其仙者乃謂之神鬼彼羗目鬼曰唐述復因名之

為唐述山指其堂密之居謂之唐述窟其懷道宗元

之士皮冠淨髮之徒亦往棲託焉故秦州記曰河峽

崖傍有二窟一曰唐述窟高四十丈西二里有時亮

窟高百丈廣二十丈深三十丈藏古書五笥亮南安

人也

地理今釋積石山在今河州北一百二十里水經注謂之唐述山其西五十里有積石關唐置

積石軍于此山海經云積石山在金城河關縣西南
境中杜佑通典云禹施功自積石而東今西平郡龍
支縣界山是也案諸家言積石者多以此為小積石
別有大積石去此尚千餘里其說蓋本于漢書西域
傳謂河源出于闐北流與葱嶺河合東注蒲昌海潛
行地下南出于積石為中國河之文其實禹施功之
始即此積石更無所謂大積石也歐陽忞輿地廣記
云班固所載張騫窮河源事乃意度之非實見蒲昌
海與積石通流其言甚正蓋河源在吐蕃境漢時吐
蕃未通中國武帝以于闐山出玉案古圖書乃名河
所出為崑崙後人遂并積石亦失其實耳至水經并
云積石在葱嶺之北則又失之遠矣或譏杜佑主龍

支之積石謂因唐置積石軍于洮河故城而誤考後漢書郡國志隴西郡河關縣積石山在西南又桓帝紀燒當羌叛段熲追擊于積石注即禹貢導河積石在鄯州龍支縣南是河州積石之名非始于唐矣一清按此言積石主通典與禹貢雖指異下封有水導錐指主水經注不以杜佑之言為然

自是山谿水南注河謂之唐述水河水又東逕野亭

南又東流歷研川謂之研川水又東北注于河謂之

野城口河水又東歷鳳林北鳳林山名也五巒俱峙

者彥云昔有鳳鳥飛遊五峯故山有斯目矣秦州記

曰枹罕原北名鳳林川川中則黃河東流也河水又

東與灕水合水導源塞外羌中故地理志曰其水出
西塞外東北流歷野虜中逕涓銅城西又東逕河列
城東考地說無目蓋出自戎方矣左右列水水出西
北谿東北流逕列城北又東入灕水城居二水之會
也灕水又北逕可石孤城西西戎之名也又東北右
合黑城谿水水出西北谿下東南流逕黑城南又東
南枝水左出焉又東南入灕水又東北逕榆城東榆
城谿水注之水出素和細越西北山下東南流逕于

細越川夷俗鄉名也又東南出狄周峽東南右合黑
城谿之枝津津水上承谿水東北逕黑城東東北注
之榆谿又東南逕榆城南東北注灋水灋水又東北
逕石門口山高嶮絕對岸若門故峽得厥名矣疑即
臯蘭山門也漢武帝元狩三年驃騎霍去病出隴西
至臯蘭謂是山之關塞也應劭漢書音義曰臯蘭在
隴西白石縣塞外河名也孟康曰山關名也今是山
去河不遠故論者疑目河山之間矣灋水又東北臯

蘭山水自山左右翼注灘水灘水又東白石川水注
之水出縣西北山下東南流枝津東注焉白石川水
又南逕白石城西而注灘水灘水又東逕白石縣故
城南王莽更曰順礫關駟曰白石縣在狄道西北二
百八十五里灘水逕其北今灘水東南注之而不出
其北也灘水又東逕白石山北應劭曰白石山在東羅谿水注
之水出西南山下東入灘水灘水又東左合罕升南
谿水出罕升西東南流逕罕升南

十三州志曰廣大坂在枹罕西北罕

開在焉一清按此句有脫字顧氏祖禹方輿紀要云
罕開谷有河州西水經注白石縣東有罕開渡又東
則枹罕故城也蓋誤以溪為渡昔慕容吐谷渾自燕歷陰山西馳而

創居於此瀕水又東逕枹罕縣故城南

應劭曰枹罕羌侯邑也十

三州志曰枹罕縣在郡西二百一十里一清按漢志枹罕縣屬金城郡續志屬隴西郡

瀕水在

城南門前東過也瀕水又東北故城川水注之水有

二原南源出西南山下東北流逕金紐北嶺北又東

北逕一故城南又東北與北水會北源自西南逕故

城北右入南水亂流東北注瀕水瀕水又東北左合

白石川之枝津水上承白石川東逕白石城北又東
絕罕开谿又東逕枹罕城南又東入澗水澗水又東
北出峽北流注於河地理志曰澗水出白石縣西塞
外東至枹罕入河河水又逕左南城南十三州志曰
石城西一百四十里有左南城者也秦州記曰枹罕
有河夾岸岸廣四十丈義熙中乞佛於此河上作飛
橋橋高五十丈三年乃就地理志曰水出塞外羌中
沙州記曰建初二年強城東北三百里有曾城城臨

洮水者也昔羌攻南部都尉於臨洮上遣行車騎將軍馬防與長水校尉耿恭救之諸羌退聚洮陽即此城也洮水又東逕共和山南城在四山中洮水又東

逕速和城北羌名也

一清按魏志鄧艾傳景元三年破姜維于侯和通鑑齊武帝紀

魏主召吐谷渾王伏連籌入朝伏連籌辭疾不至輒修臨洮泥和二城置戍兵守焉胡三省曰泥和即水經注所謂速和城洮水逕其南又逕洮陽城東宋白曰洮州臨洮郡城本名泥陽在洮水之北乃吐谷渾所築南臨洮水極險峻今謂之洪和城共和即洪和也侯和即泥和亦即逕和耳一清按共和山逕和城蜀漢姜維與魏鄧艾戰于侯和後魏太和十五年吐谷渾王伏連籌修泥和城枹罕鎮將長孫百年攻拔

之四名總為一地音聲之轉耳後魏于此置洪又東和郡後周于此置美相縣在今陝西洮州衛南

逕甘積亭歷望曲在臨洮西南去龍桑城二百里洮水又東逕臨洮縣故城北禹治洪水西至洮水之上

見長人受黑玉書於斯水上洮水又東北流屈而逕

索西城西建初二年馬防耿恭從五谿祥槁

朱氏謀
埤箋曰

一作
槁

谷出索西與羌戰破之築索西徙隴西南部都

尉居之亦曰赤水城亦曰臨洮東城也沙州記曰從東洮至西洮一百二十里者也洮水又屈而北逕龍

桑城西而西北流焉防以建初二年從安故五谿出

龍桑開通舊路者也俗名龍城

一清按龍桑城六朝史亦作桑城通鑑因

之蓋省文也不然酈以為俗名龍城豈又有桑城一名乎

洮水又西北逕步和亭

東步和川水注之水出西山下東北流出山逕步和

亭北東北注洮水洮水又北出門峽歷東歷川葦塏

川水注之水出桑嵐西谿東流歷桑嵐川又東逕葦

塏川北東入洮水洮水又北歷峽逕偏橋出夷始梁

右合葦塏川水東南石底橫下北歷葦塏川西北注

洮水洮水又東北逕龍桑城東又北會藍川水水源

出東歷川西北谿南流

一清按此處有脫字

歷川東北流逕藍

川歷水城北

一清按魏書地形志洪郡藍川縣真君八年置

東入洮水洮

水又北逕外羌城西又北逕和博城東城在山內左

合和博川川水出城西南山下東北逕和博城南東

北注于洮水洮水北逕安故縣故城西地理志曰隴

西之屬縣也十三州志曰縣在郡南四十七里蓋延

轉擊狄道安故五谿反羌大破之即此也洮水又北

逕降狄道故城西關駟曰今日武始也洮水在城西

北下又北隴水注之即山海經所謂濫水也水出鳥

鼠山西北高城嶺西逕隴底其山崖崩落者聲聞數

百里故揚雄稱響若坻類是也又西北歷白石山下

地理志曰降狄道東有白石山

一清按狄道稱降渭水篇隴縣亦稱降樂

史太平寰宇記云蘭州狄道縣漢書地理志屬隴西郡惠帝時改為武始郡以狄道為降狄道則是晉時

改稱道元引班志稱降斯其繆耳

濫水又西北逕武階城南又西北

逕降狄道故城東百官表曰縣有蠻夷謂之道有公

主謂之邑

全氏曰按本表曰列侯所食縣曰國皇太后皇后公主所食曰邑有蠻夷曰道今鈔

變割截不可曉

應劭曰反舌左衽不與華同須有譯言乃通

也漢隴西郡治秦昭王二十八年置應劭曰有隴坻在其東故曰隴西也神仙傳曰封君達隴西人服鍊水銀年百歲視之如年三十許騎青牛故號青牛道士王莽更郡縣之名郡曰厭戎縣曰操虜也昔馬援為隴西太守六年為狄道開渠引水種秔稻而郡中樂業即此水也濫水又西北流注于洮水右合二水

左會大夏川水出西山二源合舍而亂流逕金柳

城南

金氏曰金柳亦金紐之轉音魏書地形志大夏縣有金柳城

十三州志曰大

夏縣西有故金柳城去縣四十里本都尉治又東北

逕大夏縣故城南地理志曰王莽之順夏晉書地道

記曰縣有禹廟禹所出也又東北出山注于洮水洮

水又北翼帶三水亂流北入河地理志曰洮水北至

枹罕東入河是也

又東過金城允吾縣北

金城郡治也漢昭帝始元六年置王莽之西海也莽
又更允吾為脩遠縣河水逕其南不在其北西有湟
水出塞外東逕西王母石室石金西海鹽池北故關
駟曰其西即湟水之源也地理志曰湟水所出也一

清

按漢志金城郡臨羌縣西北至塞外有西王母石室
僊海鹽池北則湟水所出東至允吾入河西有須抵
池善長所引似有割截之誤且先引注文而後言臨
羌亦未合又僊海疑當作僊海僊字形相近致訛
湟水又東南流逕龍夷城故西零之地也十三州志
曰城在臨羌新縣西三百一十里王莽納西零之獻

以為西海郡治此城湟水又東南逕卑禾羌海北有

鹽池闕駟曰縣西有卑禾羌海者也

一清按漢志臨羌縣下注引闕

駟曰西有卑和羌即獻王莽地為西海郡者也世謂之青海東去西平二百

五十里

一清按太平寰宇記甘州張掖縣下云甘峻山一名紺峻山水經注云張水歷紺峻山南

與張掖河合即鮮水也今本無之方輿紀要云西海亦曰儂海鄜道元曰古西僊之地也亦曰青海亦曰卑禾羌海亦曰鮮水海亦曰允吾谷鹽池湟水東流

西海則其總名也在張掖境謂之張掖水

逕湟中城北故小月氏之地也十三州志曰西平張

掖之間大月氏之別小月氏之國范曄後漢書曰湟

中月氏胡者其王為匈奴所殺餘種分散西踰葱嶺
其弱者南入山從羌居止故受小月氏之名也後漢
西羌傳曰羌無戈爰劍者秦厲公時以奴隸亡入三
河羌怪為神推以為豪河湟之間多禽獸以射獵為

事遂見敬信依者甚衆

沈氏炳巽曰道元引此文不甚了然爰劍以被焚不死故

羌神之又以教民田畜故羌敬信之不應節去

其曾孫忍因留湟中為湟中

羌也湟水又東右控四水導源四谿東北流注于湟
湟水又東逕赤城北而東入逕戎峽口右合羌水水

出西南山下逕護羌城東故護羌校尉治又東北逕

臨羌城西東北流注于湟湟水又東逕臨羌縣故城

北漢武帝元狩元年以封孫都為侯國

沈氏曰據史漢表乃封臨

蔡非臨羌是元封非元狩全氏曰臨王莽之監羌也

蔡漢表云屬河內當是鄉亭之名也

謂之綏戎城非也湟水又東盧谿水注之水出西南

盧川東北流注于湟水湟水又東逕臨羌新縣故城

南閼駟曰臨羌新縣在郡西百八十里湟水逕城南

也城有東西門西北隅有子城湟水又東右合溜谿

伏溜石杜鰲四川東北流注之左會臨羌谿水水發
新縣西北東北流歷縣北東南入湟水湟水又東龍
駒川水注之水右出西南山下東北流逕龍駒城北
流注于湟水湟水又東長寧州水注之水出松山東
南流逕晉昌城晉昌川水注之長寧水又東南養女
川水注之水發養女北山有二源皆長湍遠發南總
一川逕養女山謂之養女川

一清按太平御覽云
彼羌多禱而祈女關

駟曰長寧亭北有養女嶺即浩媿之西西平之北山

也亂流出峽南逕長寧亭東城有東西門東北隅有金城去西平西北四十里十三州志曰六十里遠矣長寧水又東南與一水合水出西山東南流水南山上有風伯祠春秋祭之其水東南逕長寧亭南東入長寧水長寧水又東南流注于湟水湟水又東牛心川水注之水出西南遠山東北流逕牛心堆東又北逕西平亭西東北入湟水湟水又逕西平城北東城即故亭也漢景帝六年封隴西太守北地公孫渾邪

為侯國

沈氏曰據史漢表俱作平曲其子賀傳亦作平曲乃東海之屬縣全氏曰索隱曰漢表在

高城則是渤海非東海也今本無之蓋脫失也案宇

記曰在霸州永清縣漢志東海有二平曲縣齊召南

曰縣邑同名者皆異郡故或加東西字以別之東海

一郡而平曲二縣同名殊不可曉以莽所改一曰平

端一曰端平推之或者第二平曲是曲平乎道元以

為西平蓋誤以西為曲耳一清按後漢書萬修傳永

初七年鄧太后詔封修曾豐為曲平亭魏黃初中立

侯則以第二平曲為曲平非無證也

西平郡憑倚故亭增築南西北三城以為郡治湟水

又東逕土樓南樓北倚山原峯高三百尺有若削成

樓下有神祠彫牆故壁存焉闌駟曰西平亭北有土

樓神祠者也今在亭東北五里右則五泉注之泉發西平亭北雁次相綴東北流至土樓南北入湟水湟水又東右合葱谷水水有四源各出一谿亂流注于湟水又東逕東亭北東出漆峽山峽也東流右則漆谷常谿注之左則甘夷川水入焉湟水又東安夷川水注之水發遠山西北逕控衆川北屈逕安夷城西北東入湟水湟水又東逕安夷縣故城城有東西門去西平亭東七十里關駟曰四十里湟水又東左合

宜春水水出東北宜春谿西南流至于安夷南入湟
水湟水又東勒且谿水注之水出縣東南勒且谿北
流逕安夷城東而北入湟水湟水有勒且之名疑即
此號也關駟曰金城河初與浩疊河合又與勒且河
合者也湟水又東左合承流谷水南入右會達扶東
西二谿水參差北注亂流東出六谷山也東流期頓
雞谷二水北流注之又東吐那孤長門兩川南流入
湟水湟水又東逕樂都城南

一清按後漢書馬武傳
又戰于洛都谷章懷注

云湟水一名洛都水西自吐谷渾界入在今鄯州湟水縣洛都即洛都也東流右合來谷

乞斤流二水左會陽非流谿細谷三水東逕破羌縣

故城南應劭曰漢宣帝神爵二年置城省南門十三

州志曰湟水河在南門前東過六谷水自南破羌川

自北左右翼注湟水又東南逕小晉興城北故都尉

治關駟曰允吾縣西四十里有小晉興城也湟水又

東與閣門河合即浩疊河也水出西塞外東入塞逕

敦煌酒泉張掖南東南逕西平之鮮谷塞尉故城南

又東南與湛水合水有二源西水出白嶺下東源發于白岸谷合為一川東南流至霧山注閤門河閤門河又東逕養女北山東南左合南流川水出北山南流入于閤門河河又東逕浩亶縣故城南王莽改曰

興武矣闕駟曰浩讀閤也故亦曰閤門水兩兼其稱

矣又東流注于湟水故地理志曰浩亶水東至允吾

入湟水

一清按師古曰浩音誥水名也亶者水流峽山岸深若門也今俗呼此水為閤門河蓋疾

言之耳又東逕允吾縣北為鄭伯津與澗水合水出令

居縣西北塞外南流逕其縣故城西漢武帝元鼎二年置王莽之罕虜也又南逕永登亭西歷黑石谷南流注鄭伯津湟水又東逕允街縣故城南漢宣帝神

爵二年置王莽之脩遠亭也

一清按漢志無亭字然莽改允吾縣為脩遠則

此宜有亭字以別于郡治今漢書有脫文當以水經注補之

縣有龍泉出允街谷

泉眼之中水成交龍或試撓破之尋平成龍畜生將飲者皆畏避而走謂之龍泉下入湟水湟水又東逕枝陽縣逆水注之水出允吾縣之參街谷東南流

逕街亭城南又東南逕陽非亭北又東南逕廣武城
西故廣武都尉治郭淮破羌治無戴于此處也城之
西南二十許里水西有馬蹏谷漢武帝聞大宛有天
馬遣李廣利伐之始得此馬有角為奇故漢武天馬
之歌曰天馬來兮歷無草逕千里兮巡東道胡馬感
北風之思遂頓羈絕絆驤首而馳晨發京城食時至
敦煌北塞外長鳴而去因名其處曰候馬亭今晉昌
郡南及廣武馬蹏谷盤石上馬跡若踐泥中有自然

之形故其俗號曰天馬逕夷人在邊效刻足有大小之迹體狀不同視之便別矣水又東逕枝陽縣故城

南東南入于湟水地理志曰逆水出允吾參街谷東

至枝陽入湟

一清按漢志謂之烏亭逆水

湟水又東流注于金城

河即積石之黃河也關駟曰河至金城縣謂之金城

河隨地為名也釋氏西域記曰牢蘭海東伏流龍沙

堆在屯皇

一清按屯皇即敦煌師古曰敦音屯漢志曰敦煌郡有白龍沙堆

東南四

百里阿步干

一清按通鑑晉紀魏冀州刺史阿薄干胡三省註魏書官氏內入諸姓阿伏干

氏後為阿氏薄伏皆與步音通
轉而人又取山之號為姓名也
鮮卑山
一清按三字注中注
東

流至金城為大河出崑崙崑崙即阿耨達山也河水
又東逕石城南謂之石城津關駟曰在金城西北矣
河水又東南逕金城縣故城北應劭曰初築城得金
故曰金城也漢書集註薛瓚云金者取其堅固也故
墨子有金城湯池之言矣王莽之金屏也世本曰鯀
作城風俗通曰城盛也從土成聲管子曰內之為城
外之為郭郭外之土開池高則溝之命之曰金城十

三州志曰大河在金城北門東流有梁泉注之泉出縣之南山按耆舊言梁暉字始娥漢大將軍梁冀後冀誅入羌後其祖父為羌所推為渠帥而居此城土荒民亂暉將移居枹罕出頓此山為羣羌圍迫無水暉以所執榆鞭豎地以青羊祈山神泉湧出榆木成林其水自縣北流注于河也

又東過榆中縣北

昔蒙恬為秦北逐戎人開榆中之地按地理志曰金

城郡之屬縣也故徐廣史記音義曰榆中在金城即

阮嗣宗勸進文所謂榆中以南者也

一清按任氏廣書叙指南曰水

經河州地名曰榆城太平寰宇記河州枹罕縣榆城
溪烏頭川在郡東方與紀要蘭州有榆中城漢縣杜

佑以為即故大
小榆谷誤也

又東過天水北界

苑川水出勇士縣之子城南山東北流歷此成川世
謂之子城川又北逕牧師苑故漢牧苑之地也羌豪
迷吾等萬餘人到襄武首陽平襄勇士至此抄苑馬

焚燒亭驛即此處也又曰菟川水地為龍馬之沃土
故馬援請與田戶中分以自結也有東西二菟城相
去七里西城即乞佛所都也又北入于河也

又北過武威媼圍縣東北

河水逕其界東北流縣西南有泉源東逕其縣南又

東北入河也

全氏曰按胡三省曰禿髮僭檀之拒赫連其臣焦朗勸令從溫圍水北渡疑因

媼圍縣得名譌媼為溫也前此晉馬隆討涼州鮮卑渡溫水則省文也後此拓跋伐沮渠李順謂自溫圍

水至姑臧則又譌圍為圍矣是即道元所謂泉源逕縣南入河者

又東北過天水勇士縣北

地理志曰滿福也屬國都尉治

一清按漢志勇士縣下云屬國都尉治滿

福似別是一城道元顛倒引之有舛誤也

王莽更名之曰紀德水出縣山

全氏曰此句有脫文當云有水出縣西後漢書西羌傳趙冲復追羌到建威鷁陰河章懷注曰續漢志建威作武威鷁陰縣名屬安定後漢屬武威

來白曰即水經河水東北過勇士縣處也

世謂之二

十八渡水東北流谿澗縈曲途出其中逕二十八渡

行者勤於溯涉故因名焉北逕其縣而下注河又有

赤曄川水南出赤蒿谷北流逕赤曄川又北逕牛官

川又北逕義城西北北流歷三城川而北流注于河也

又東北過安定北界麥田山

河水東北流逕安定祖厲縣故城西北漢武帝元鼎五年辛雍遂踰隴登空同西臨祖厲河而還即于此

也王莽更名之曰鄉禮也李斐曰音賴

一清按五字注中注全氏

曰漢書注李斐云祖厲音嗟賴祖字从衣不从示从示者作阻聲是也

又東北祖厲川

水注之水出祖厲南山北流逕祖厲縣而西北流注

于河河水又東北逕麥田城西又北與麥田泉水合
水出城西北西南流注于河河水又東北逕麥田山
西谷山在安定西北六百四十里河水又東北逕于
黑城北又東北高平川水注之即苦水也水出高平
大隴山苦水谷建武八年世祖征隗囂從高平第一
苦水谷入即是谷也東北流逕高平縣故城東漢武
帝元鼎三年置安定郡治也王莽更名其縣曰鋪睦
西十里有獨阜阜上有故臺臺側有風伯壇故世俗

呼此阜為風堆其水又北龍泉水注之水出縣東北
七里龍泉東北流注高平川川水北出秦長城城在
縣北一十五里又西北流逕東西二太婁故城門北

合一水水有五源咸出隴山西東水發源縣西南二

十六里湫淵淵在四山中

一清按漢志安定郡朝那縣有湫淵祠說文云安定

朝那有湫泉劉昭補註續志云朝那有湫淵方四十里傳不流冬夏不增減不生草木

湫水北

流西北出長城北與次水會水出縣西南四十里長
城西山中北流逕魏行宮故殿東又北次水注之水

出縣西南四十里山中北流逕行宮故殿西又北合
次水水出縣西南四十八里東北流又與次水合水
出縣西南六十里酸陽山東北流左會右水總為一
川東逕西太婁北東注苦水段頗為護羌校尉於安
定高平苦水討先零斬首八千級於是水之上苦水
又北與石門水合水有五源東水導源高平縣西八
十里西北流次水注之水出縣西百二十里如州泉
東北流右入東水亂流左會三川參差相得東北同

為一川混濤歷峽峽即隴山之北垂也謂之石門口

水曰石門水在縣西北八十餘里石門之水又東北

注高平川川水又北自延水注之西出自延谿東流

歷峽謂之自延口在縣西北一百里又東北逕延城

南東入高平川川水又北逕廉城東按地理志曰北

地有廉城縣

一清按漢志北地郡廉縣不云廉城縣亦見下卷

閼駟言在富

平自昔匈奴侵漢新秦之土率為狄場故城舊壁盡

從胡目地理論移不可復識當是世人誤證也川水

又北苦水注之水發縣東北百里山流注高平川
水又北逕三水縣西肥水注之水出高平縣西北二

百里牽條山西

一清按方輿紀要平涼縣有牽屯之名見北史爾朱天光及賀拔岳傳亦


即地理志之升頭山師古曰升音苦見反又音牽土俗語詢謂之升屯山杜佑曰升頭山謠為牽屯山此云牽條蓋異名也

東北流與若勃谿合水有二源總歸一瀆

東北流入肥肥水又東北流違泉水注焉泉流所發
導於若勃谿東東北流入肥肥水又東北出峽注於
高平川水東有山山東有三水縣故城本屬國都尉

治王莽之廣延亭也西南去安定郡三百四十里議
郎張奐為安定屬國都尉治此羌有獻金馬者奐召
主簿張祁入于羌前以酒酹地曰使馬如羊不以入
廢使金如粟不以入懷盡還不受威化大行縣東有
溫泉溫泉東有鹽池故地理志曰縣有鹽官今於城
之東北有故城城北有三泉疑即縣之鹽官也高平
川水又北入于河河水又東北逕朐卷縣故城西地
理志曰河水別出為河溝東至富平北入河河水於

此有上河之名也



水經注釋卷二